

東
華
續
錄

光緒一百八十八

臣朱壽朋敬編

臣章圭璩恭校

六月己酉諭方今時事多艱民生重困而官吏朘蔽下情不通甚至地方錢糧浮收中飽以完作欠百弊叢生大負朝廷恤民之意著各省督撫將各屬經徵錢糧限三箇月內開列簡明表冊該州縣錢糧正額若干現在實徵若干向係收銀者注明每賦一兩正耗各收銀若干或係收錢折銀或係收銀圓作銀均注明每銀一兩折收若干每漕糧一石收本色者正耗各收米若干收折色者每石收銀錢若干此外有無陋規雜費逐一登明據實聲敘各令利盤託出不准含混遺漏俟該省奏報到後著戶部核對由政務處刊入官報俾眾共知藉以察官方而通民隱各該督撫務卽認真辦理毋得徇飾宕延倘敢敷衍搪塞定將該省藩司糧道從重懲處○以湯詠山爲新疆阿克蘇鎮總兵○庚戌諭朕欽奉 慈禧端佑康頤昭豫莊誠壽恭欽獻崇熙皇太后懿旨鑲黃旗滿洲都統那彥圖等代奏前山東布政使崇保情殷祝嘏請旨一摺本年萬壽昨已降旨所有各省將軍督撫以下等官均毋庸奏請祝嘏業經明白宣示該都統等卽復代奏殊屬冒昧著傳旨嚴行申飭○諭軍機大臣等淮安關監督缺業經降旨裁撤所有該關應

辦事宜籌卽移交兩江總督辦理近來淮安關徵收異常短絀而商民且多苛擾有煩於民無益於商朝廷銳意裁撤交該督經理卽將該關現在情形確切查明妥籌徵收善策詳細具奏總期積弊一清稅收核實商民不擾是爲至要○辛亥諭御史徐庠奏廣西軍務喫緊請飭已革提督蘇元春帶罪前往相機剿撫一摺廣西匪事蔓延皆由蘇元春養癰貽患言之實堪痛恨朝廷將該員量予減罪已屬格外從寬乃該御史輒敢曲爲保奏實屬荒謬膽大徐庠著回原衙門行走以示薄懲○諭軍機大臣等有人奏庫倫辦事大臣德麟濫職營私有誤大局一摺著奎順按照所參各節確切查明據實具奏毋稍徇隱原摺著鈔給閱看將此諭令知之○壬子柯逢時奏柳桂交界之區青山蟠屈三百餘里其陽爲四十八峒大半在雒容轄境其陰爲三十六峒大半在永寧轄境狼壁揉巖地形險阻向爲盜匪窟穴其峒口無數與永福柳城融縣處處可通歷朝以來皆用重兵咸豐年間曾聚匪滋事迭煩兵力始克綏靖乃歷時未久仍爲通逃淵藪時肆劫掠爲害閭閻上年署督臣岑春煊派營剿捕雖經獲匪首覃老發懲辦而游土各匪盤踞其中者尙不可縷數乘間出擾劫案無數凡近峒之村無人不入其會潛爲供給糧食偵探官兵蹤跡互相煽誘旬串益多有不入其會者則火其廬掠其人口擄其財畜而後已地方官亦無從查緝該地距省僅百餘里臣未蒞粵卽聞桂林屬境伏莽潛滋履任後查開峒匪實繁恐遂滋蔓迭經檄

堵剿每有擒賊而藏垢納污愈聚愈衆本年正月派奏調河南候補知府黃鳳岐統領親兵三營往剿營帶左營周天長奮勇直入其巢極多悍匪山徑險巇軍兵深入陣亡弁勇共七十餘名旋又派親兵一營復飭署慶遠府知府白玉審調慶防三營適署右江道王芝祥帶領常備前營來會約分五路進兵又派道員褚興周前往調遣一面分飭永甯龍容等州縣選派得力鄉團爲各軍引導免致疏虞並飭永福柳城融縣諭令公正團紳調集壯丁在於峒口之處日夜梭巡認真防堵以杜零匪乘虛竄入貽害地方計自二月初旬以來仰賴天威官軍合力進剿緝匪鑿險逐處窮搜竭數月之力擒獲積年悍匪辜世德羅榮才辜祖英辜祖欽陳十四莫永旺莫土金蔡小五黃章遠卓仲向覃章勳覃章安黃酸梅四等訊明正法先後斃匪約三百餘名奪獲鎗砲刀械多件焚去匪巢二百七十餘間峒匪殲除殆盡餘皆連廳而應將營後事宜妥爲籌畫以期斷絕根株一勞永逸峒內向住獠獠久已逃散現在並無居民然如舊村等處皆有田地可耕必須設官整理方得遷集勞來查桂林府同知本係開曹即以該同知移駐峒內以資彈壓而復巡防該同知俸廉役食等款一仍其舊勿庸另議查有候選知府雷震南前帶楚軍頗稱得力堪以署理桂林府同知所有前派剿匪之親兵四營除死亡病故外現經簡其精壯併爲桂防正副兩營卽委該員統領自帶正營於峒內建造營房並飭於要隘修築礮樓派兵防守各峒小口一併填塞

喇外各村派副營駐紮辦理清鄉一俟部署周妥再行詳細陳明得 旨如所請行○癸丑諭軍機大臣

等前據張之洞等奏江南製造局移建新廠一摺製造局廠關緊要究竟應否移建地方是否合宜鎔
礪諸製若何盡利著派鐵良前往各該處詳細考求通盤籌畫據實覆奏並著順道將各該省進出款項
及各司庫局所利弊逐一查明併行具奏○甲寅增祺奏奴才前以哲里木盟科爾沁扎薩克鎮國公旗
地段與扎薩克圖五旗現在放荒地毗連其地亦頗堪招墾當經札派總辦扎薩克圖荒行局分省試用
知府張心田就近親往勸導並咨理藩院哲里木盟長札行該公旗在案現據該扎薩克公拉什敏珠爾
並委員張心田先後呈稱該扎薩克公於委員到旗後遵卽與協理官員及旗衆人等商議妥協擬將本
旗南段一帶荒地寬長各百里收價招墾並以該旗現有辦公急需懇先借銀一萬兩俟收有地價卽在
該旗應得正款項下扣還等情呈請核奏前來奴才查近來各蒙旗牧政日衰咸知耕種有益往往私招
民墾並無一定章程近至民人廣集私相展拓帶索不遂又欲施以驅逐而佃戶安土重遷動輒衆滋
事比年訟案層見疊出辦理甚爲棘手誠不若由官丈放不特墾戶升科納賦視爲恆產之依而蒙旗得
收地價歲租尤獲無窮之利況設官建治則保障堪資目今已經招墾各旗莫不耕鑿相安人歌樂利奴
才前於光緒二十一年在署理黑龍江將軍任內奏陳興利大端摺內請將各蒙荒一律由官查核丈放

更以此也茲該扎薩克鎮國公拉什敏珠爾及該旗衆人等以時勢艱難願將該旗南段荒地由官派員丈放收價招墾實屬深明大義與甘受困弊故步自封者迥乎不同至該旗所請暫行撥借銀一萬兩業飭如數撥交具領俟收有地價如數扣還歸款相應據情奏 聞如蒙 聖恩俯准招墾恭候 命下之日卽行設局派員妥擬章程前往開辦至於該旗報効之款亦卽查照扎薩特扎薩克圖現辦成案體察情形一併奏明辦理得 旨允行○庚申諭軍機大臣等有人奏浙江歸安縣知縣朱懋清等曲徇教士之請逼賣民地公產恐釀巨案請旨飭查等語著該部知道欽此○光緒三十年正月二十一日奉 上諭外務部代遞總看將此諭令知之○魏光燾奏准軍機大臣字寄光緒三十年正月二十一日奉 上諭外務部代遞總稅務司赫德條陳一摺據總稅務司稱練兵籌餉以地丁錢糧爲大宗若竭力整頓卽用此款練兵并可舉辦各項要務按里計畝按畝計賦令每畝完錢二百文確可經久百姓亦不受絲毫擾累等語現在財用匱乏幾於羅掘俱空一切應行要政如練兵等事尤爲萬不容緩之舉需款更殷亟應切實通籌期有良法該督等按照所陳各節體察情形悉心會商逐條覆議妥速具奏原節略著鈔給閱看等因欽此當經臣咨會直隸四川兩廣閩浙湖廣各督臣籌議辦理伏查該總稅務司條陳以籌款爲綱以辦事爲目籌得之款肯及於練兵置械並舉辦一切增官俸設學堂推廣郵政整理電局諸務誠爲今日自應要圖

惟其所陳籌款之方專歸重於整頓地丁欲舉一切國用取資於是是則揆之中國情形固不盡然即證之各國章程亦多有未合者請爲我 皇太后 皇上縷晰陳之攷中國所以取於民者其法不一古代賦稅並行徭役漢世田租之外復有口算唐租庸調三者并稅皆不全取之於地又歷代皆以農田所入爲正供其輸之有常而取之不擾即遇國家萬不得已興利之臣亦惟議權鹽鐵茶酒等稅而不以傷農此載之歷史而可信者也各國歲入之款有視中國加十倍者然其所列收入諸門如消費稅印紙稅關稅皆佔巨額而地租視諸項尙不算大宗日本歲入之數凡二萬數千萬元然如印紙關稅外又有酒稅又煙草醬油專賣等稅亦官收巨款而酒稅一項且過於地租是各國賴振興商務以爲開財之源并無專恃地租以充國用之事至其按照中國地方開方計畝所擬之數又未免太多查中國現在里畝照戶部則例內載各省田地共計七百四十二萬餘頃今節略所稱以中國幅員面積推算乃謂有八千兆畝減半折算尙有四千兆畝夫四千兆畝卽四千萬頃也比中國現數七百四十二萬餘頃增多之率殆五倍有餘伏以我 朝政尙寬仁務恤農功以安閭里其中細民匿賦有未清查新地升科不盡核實誠使疆吏力加整頓一經查考得法各行省所有田畝斷不止於此數此則可知者若如節略所陳謂由業戶將所有地畝開單具圖赴縣呈報三年之後歲入可至四百兆兩則田畝亦必有四千兆畝方合此數是

一舉而中國溢田畝乃至三千數百餘兆畝之多臣竊恐其必無是理若夫地有高下田有肥瘠是以科則分爲輕重此則歷代因田制賦之常經若如所稱令每畝一律完錢二百文是使上田竟科薄賦瘠壤反予重徵比而同之自來亦未有此辦法就令通扯平均計算亦覺徵賦過重查近年通國所收錢糧大概計之不過三千萬兩內外若謂此法一行試辦三年即可收四百兆兩是比較舊額增至一十三倍竊恐歐美日本諸邦亦斷無驟進遞加如此之速施之中國又安能必其可行也夫中國如陝甘雲貴等省素稱貧瘠者無論矣卽就江南而言固號稱財賦之域然以地圖按之江南所轄江蘇江西安徽三省統關內各行省計之實佔地面九分之一依節略所言以四千兆畝九分之三應有地四百四十餘兆畝今按戶部則例所載三省地畝不過一百四十餘兆畝猶不足三分之一賦額則蘇寧兩處每畝折徵有自三四百文以至四五百文者然江北瘠薄之區暨江西安徽兩省中下之田每畝僅完數十文灘租蘆課又每畝祇完十數文合計之每畝不過百文有零是照每畝完納二百文之說又僅得其半矣夫以江南地利全關賦額最重之邦照現在所收之數比該總稅務司所擬之數相去猶甚懸絕則推之他省更不待言此其窒礙難行情形已可概見惟是該總稅務司以外臣久在中華深識時局代危將來其法雖不能盡行其言並非過慮如所陳練兵興學諸務今日若再不及時舉辦前途憂虞可危誠如 聖諭

所云一切應行要政如練兵等事爲萬不容緩者臣深受 國恩地居重任固晝日夜圖維其得良法以佐度支之急而分宵旰之憂再四籌思以爲與其虛擬一不可知之數重虛煩苟不如就此已辦到之成規加之釐剔查光緒二十五年間蘇省清盤田賦遵委現署臬司候補道朱之榛明定章程督屬舉辦綜計蘇州鎮江二府屬長洲等十三縣熟田項下銀米兩項每年共增出銀五十餘萬兩若由蘇鎮二府推之他府更由江蘇一省推之他省得人而理當亦不難照行此外西北廣大之野更宜開墾荒地多實軍屯東南流域所有沙田漲灘應卽清丈升科從實墾辦又可於閩廣湘贛等處講求林政推廣種植以開利源是皆屢見明文而辦理尙未覩成效者應請 旨飭部嚴定考成酌予期限責以成效再由各省詳立章程切實辦理竊以爲就上數端各省未能認真整頓數年之後 國家每歲似可增入一二千萬兩以濟要需核與該總稅務司所籌者數目雖尙懸殊無如綜計天下農田民力所堪只有此數如此則根本尙不至動搖於綜理財政之中仍寓安輯黎元之意區區愚忱惟在於是此則微臣夙夜所爲兢兢者也下政務處議奏○癸亥諭朕欽奉 慈禧端佑康頤昭豫莊誠壽恭欽獻崇熙皇太后懿旨準良代奏青海住牧盟長車琳端多布等以本年七旬萬壽請藉值年班呈齋貢物赴京祝嘏等情一摺該蒙古王公等合詞籲請具見悃忱朝廷深爲嘉許惟念物力艱難藩情正多困苦該貝子等誓毋庸祝嘏及呈進

實物以示體恤所有年班照例來京之處仍舊准行○予浙江歸安縣節婦吳周氏旌表○乙丑袁世凱奏庚子夏間拳匪起徧地如毛始而拳匪屠戮教民繼而拳匪互相仇殺終而教民搜誅拳匪一家數十命或十餘命或數命之案到處皆有其波及良善者亦不知凡幾地方官當時既禁無可禁事後又辦不勝辦迨二十七年夏間前督臣李鴻章以公約既定籌辦善後而乘亂戕殺之案異常棘手擬按律懲治而民教兩途莫可究詰羣匪嘯聚勢成巨燭因念大亂之餘宜有更始之令遂通行曉諭凡有亂時相仇各案概予完結不准尋仇報復冀可解散黨類各安反側迨臣抵任後仇教案件仍未全息而因案牽涉之盜賊專以搶劫爲生者實繁有徒百十成羣漸同流寇臣復申明前飭並飭營吏嚴密防查擇其凶悍素著者緝獲懲辦數逾千百并嚴禁報復分收私械經營年餘地方始就安謐現又事越數年自宜不追既往予以自新若將舊案遂起翻騰轉恐不肖者人人自危從此多事近據各屬稟報頗有因庚子殘殺各國報復又有昔之拳匪入奉耶蘇教以受其庇與天主教聚眾格鬪傷斃人命者亟應杜漸防微以弭隱患臣忝領畿疆非不知庚子殘殺沈寃至堪痛惻矣多且鉅株連太衆一經查辦恐已安者復爲騷動已結者復起波瀾拳匪之案固難結束而民教之案尤費周章當此聯軍未退邊境多事必先請內訌何事自行擾亂可否仰懇 天恩俯准仍照前督臣李鴻章通行辦法所有公約未定以前拳匪民教尋

仇各案件一律免究如有因緣纏訟者均立案不行其業經審結之案仍照原擬辦理并由臣督飭各屬嚴禁報復庶足以靖人心而杜亂萌得旨如所請行○戊辰諭御史爲朝廷耳目之官必須學識明通方足以資獻替嗣後宗室滿蒙御史均著照漢員之例一體考試惟滿員五品人數不敷自應量爲推廣所有各衙門六七品實任京官著各該堂官擇其品端守潔者切實保送其內務府五品以下滿蒙人員如有堪膺此選者准其一律保送攷試○癸酉 萬壽聖節 上御仁壽殿受賀○諭軍機大臣呈遞袁世凱電據稱永定河水勢陡漲險工環生當經竭力搶護連日風雨大作人力難施二十日南四工漫口二十二日南二工漫口已飭趕籌堵築等語著袁世凱嚴飭該員迅將漫溢各工趕緊堵合並派實心任事之員速放急賑以拯災黎毋任一夫失所至電內稱俟過花衣期再行奏報朝廷以民爲重時切痼瘼凡關係國計民生事件毋庸拘泥迴避○甲戌 上奉 慈禧端佑康頤昭豫莊誠壽恭欽獻崇熙皇太后由頤和園還海○丁振鐸奏防營積弊日甚一日非隨時整飭更無以備緩急之用查滇省各營哨弁向歸營務處派充其營官之不肯者或尙不無顧忌弊端雖未能盡絕時因有所牽制未敢肆行嗣乃藉口哨弁非自揀派呼應不靈改由各營官自行選弁稟委意以謂可收臂指之益實則通同一氣祇便私圖缺額餉賄賄請託皆視若固然毫無忌憚及過差操則紛紛僱人頂替中飽與否合格與否漠然不

關於心雖記過申飭數衍如昔怠玩操防種種欺飾與練營積習無異設遇戰事其何以堪前年廣南
販匪之役各營兵勇聞警輒逃良有以也上廉得其情特爲明定章程與該員弁吏始期於耳目心志煥
然一新並飭營務處於武備新操兩學堂均選熟習測量鎗法較準之員生每營委往一名充當哨弁兼
令教習新操將該營原派之弁撤去一名卽飭該員生認真稽查教練務令入皆足數俾成精銳斷不許
通同舞弊此後各營哨弁非諳熟新操不准濫竽充數如該管帶等或以非其親歷故與爲難該哨長教
習等或恃山省委挾制把持仍由上不時遴委廉正之員分往密查聞見既確卽當欽遵歷奉諭旨嚴
參究辦律以軍法總期實事求是力祛鋼習以仰副 聖主惓念邊陲整飭戎行之至意得 旨所擬新
章尙能整頓積弊練兵處兵部知道單併發○乙亥 上詣 大高殿 壽皇殿行禮○丙子山東利津
縣薄莊黃河漫口○是月比利時國使臣姚士登回國尙爾業繼之

秋七月丁丑朔時享 太廟 上親詣行禮○諭袁世凱奏永定河堤工漫口分別參辦並自請議處一
摺前據該督電稱河水陡漲南四等工漫口當經降旨飭令趕緊堵築並速放急賑以拯災黎茲據奏報
詳細情形漫溢之處衝刷口門寬至一百餘丈雖因山水暴發人力難施在工各員究屬疎於防範南岸
二工良鄉縣縣丞方恩培著革職留工効力南岸同知程鴻寶著革職留任南岸四工固安縣縣丞王治



安著摘去頂戴永定河道衛杰著革職留任現在因病交卸仍責令留工袁世凱督率無方並著交部照例議處餘著照所議辦理該部知道○戊寅 上御乾清宮比國使臣謁術業觀見○上奉 慈禧端佑
康頤昭豫莊誠壽恭欽獻崇熙皇太后幸頤和園駐蹕○諭前據御史朱錫恩奏參浙江道員許貞幹等
搖搖貪黷各款當經諭令李興銳確查茲據查明覆奏許貞幹雖查無招搖納賄確據惟聽信屬員勒罰
鉅款實屬失於閑檢候補道許貞幹著以同知降補仍留浙江由該撫隨時查看孝豐縣知縣趙金壽居
官不謹聲名甚劣著卽行革職候補鹽大使徐德立辦事浮躁品性貪婪著革職永不敘用以示懲儆餘
著照所議辦理該部知道○李經羲奏川黔各軍剿平仁懷縣屬聚眾起事妖匪現在地方如常安謐請
將川軍尤爲出力人員分別擇保懇 恩給獎以資鼓勵得 旨趙爾豐劉兆庚均著交部從優議敘其
餘出力川軍准其酌保數員毋許冒濫○李興銳奏光緒二十九年八月初六日欽奉 上諭商部奏擬
設立礦務工藝各項公司著各省將軍督撫會同籌畫悉心經理等因欽此臣因閩省礦產甚富辦
理尙無成規致爲外人覬覦必須招商集股設立公司方足以自保利權擬將通省礦務均歸商政局統
轄督飭商會紳董糾合殷富仿照湖南辦法先行設立總公司分廠承辦業經奏明在案伏查閩省連山
千里礦產頗饒外人覬覦已非一日徒以籌本不易礦學未興初則創始維艱不免資棄於地繼則句串

百出終至利屬於人若不早自爲計攘奪紛來流弊胡底近年湘鄂各省經營礦務大都先行派員查勘擇地圈購卽一時無款興辦亦可留俟後圖而以湖南所設總公司章程較爲妥善亟應變通仿照期總全綱現擬就省城設立福建全省礦務總公司卽派總辦商政局前福建按察使楊文鼎現任鹽法道鹿學良爲監督分派委員馳赴各屬會同地方官確切查明境內共有礦產若干分別官地民地已採未採詳細報明註冊除先經奏定暫歸華裕公司限內覓地之建汀邵三府礦產另行核辦外其餘通省產礦山場統歸總公司主持管理不准他人包攬總公司辦礦區域分爲兩路以寧福延建二道所屬爲北路興泉汀漳龍二道所屬爲南路南北兩路各派總理一人分任其責兼司本路購地鍊礦各事查有在籍候選道羅忠堯堪以派爲南路總理丁燮在籍前江西撫州府知府何剛德堪以派爲北路總理均受成於總公司由官刊發關防俾資信守應需本銀卽歸官商合力籌集仍先酌撥公款陸續收購股票以爲提倡補助之需總公司開辦之初應先延聘礦師分途勘驗酌設鍊廠就地收砂遇有將來或招商承辦分設公司或酌派員紳自籌開採視集股之多寡次第舉行所有本省外省紳商人等有願籌集資本請辦各路礦務者祇准指定一礦作爲總公司之分公司按照總公司所定章程切實遵守無論何人概不准徑自請辦以一事權此外民間資本無多用土法就礦自行開採者悉聽其便惟所出五金礦砂概歸

總公司作價收買應抽礦稅卽就礦砂價內照數扣解以重國課似此變通推廣庶足以囑杜侵越開闢利源據福建商政局擬定章程請奏咨前來臣覆加查核所擬章程均尙周妥亟應照辦下所司知之○庚辰詣鹿傳霖署工部尙書以道爾巽署戶部尙書○癸未諭軍機大臣等前有旨派鐵良前往江蘇等省查勘移建製造局廠事宜並查各省進出款項現在武備關係緊要屢經降旨飭令各省切實整頓痛除陋習著鐵良於經過省分不動聲色將營隊酌量抽查兵額是否核實操法能否合宜一切情形據實具奏○甲申諭袁世凱奏永定河伏汛期內盛漲北下汛續漫一口分別參辦一摺前因南四工等漫口業經降旨將在工各員處此此次北下汛又復失事雖據稱風狂雨暴人力難施嗣汛各員究屬疏於防範北下汛宛平縣縣丞程景瀛著革職留工効力著石景山同知文德著革職留任署永定河道毛慶蕃甫經接印尙屬籌防不及著免其議處仍著袁世凱督飭各員趕緊堵築並派委員分投查放急賑以拯災黎毋任失所餘著照所議辦理○丁亥上詣建福宮孝貞顯皇后聖容前行禮○戊子諭軍機大臣等有人奏江蘇官吏貪污營兵劫掠緝單糾參一摺所有各員劣款著端方按照所參逐一確切查明據實具奏原摺單著鈔給閱看將此諭令知之○蠲免四川夔州等府州縣錢糧○外務部奏法國使館交還儀器二十八件應由欽天監將觀象臺修理整齊照舊安設報聞○己丑諭軍機大臣等有人奏

浙江秀水縣城內白晝搶劫戕殺事主該縣並不上緊緝捕勒令改爲被竊希圖規避處分等語著李興銳確查具奏毋稍徇隱原摺著鈔給閱看將此諭令知之○庚寅 上奉 慈禧端佑康頤昭豫莊誠壽恭欽獻崇熙皇太后由頤和園還海○辛卯 上詣 奉先殿 壽皇殿行禮○壬辰商部奏臣部於光緒三十年七月十二日接據江蘇在籍臣部頭等顧問官翰林院修撰張謇在籍安徽候補道許鼎霖前廣東惠潮嘉道丁寶銓湖北候補知府黃以霖候選知府林松唐在籍翰林院編修陳同禮等聯名呈稱徐州府宿遷境三臺嶧山峒嶧等處向產玻璃砂料歷有傳教外人前往探驗經德比兩國名廠工師化分考驗砂質純良若不早自經營無異懷藏海盜且宿遷地當南北要衝運道水陸皆通又距嶧山等處蘊蓄甚近煤炭石灰足供煉製人多游手工價尤廉就此建廠洵稱利便爰議立耀徐公司購置砂地三千六百餘畝先集股本銀五十萬兩以便建立巨廠暨興大利惟事屬創始風氣未開攬奪阻撓均未免呈請奏咨立案准予專利二十年卽將該縣境內產砂之地次第由該公司照時價核購以便隨時擴充不得零售他人并通飭地方文武照章保護等情呈請奏咨前來臣等竊維玻璃一項於製造之法中國素未講求凡宮室舟車器用所需大半來自外洋據海關貿易冊進口貨玻璃片料器燈器項下光緒二十六年值關平銀九十九萬一千餘兩二十八年增至一百八十四萬七千餘兩利源外溢年逾一年

且時價日長比前加倍 部有鑒於此當於工藝局購設之玻璃料力籌展拓特採順屬房山縣玻璃
礦延致廣東及山東博山縣之著名工匠來京選料精製思爲挽回利權起見今該紳張鑾等請創設
耀徐玻璃公司意在振興實業洵堪嘉尚擬請准予立案并准其在徐州境內專辦十年即飭令該紳等
妥速籌辦惟是淮徐一帶風氣初開創立公司事宜誠不免有機奪阻撓情事應請 飭下兩江總督漕
運總督江蘇巡撫通飭蘇屬實力保護不得稍存膜視一面由 部諭令該紳等按照 部奏定公司章
程切實辦理隨時咨報查核得 旨如所請行○癸巳 上諭 奉先殿 壽皇殿行禮○諭周馥奏山
東黃河伏汛盛漲下游北岸利津縣境薄莊堤岸漫溢情形一摺本年五月下旬雨多晴少河水逐日增
漲六月以來利津縣南岸十六戶廢墟衝毀溜勢自莊窩下移薄莊堤岸潰溢口門刷寬一百餘丈被淹
二十餘村鹽灘二十一窩雖因堤曲浪湧人力難施究屬疎於防範所有防汛委員候補知縣張瑄試用
從九品王薦明管帶津北營游擊王得坪哨官守備趙興禮著一併革職留工効力署利津縣知縣吳士
釗著革職留任總辦下游道員朱式泉提調試用知府高令詰著一併交部議處周馥督率無方著交部
議處仍著嚴飭各工員竭力搶護毋得再有疎虞所有被災地方著卽遴派委員迅放急賑妥爲撫恤毋
任失所○諭柯逢時片奏記名提督廖景銳駐紮平山被叛勇圍困全營裹脅縱賊掠稍現聞爲匪所殺

廖景銳著先行革職撤銷勇號仍著確查辦理候選知府雷震南代領桂防赴岷數月毫無布置原營勇隨意更換缺額甚多著革職嚴行審辦副哨拔補把總翟榮卿於廖景銳縱賊時不肯順從隨同官軍進剿力竭陣亡著交部從優議卹餘著照所議辦理○甲午 上奉 慈禧端佑康頤昭豫莊誠壽恭欽獻崇熙皇太后幸頤和園駐蹕○諭軍機大臣等有人奏浙江塘工歲糜鉅款承辦各員漫不經心交相掩飾等語著該督撫按照所陳各節切實查覆認真經理以重要工原片著鈔給閱看將此諭令知之○諭軍機大臣等有人奏杭州將軍常恩任性妄為罔識大體請飭查辦一摺著李興銳按照所奏各款確切查明據實覆奏毋稍徇隱原摺著鈔給閱看將此諭令知之○諭崧蕃奏黃河泛漲被災情形一摺甘肅皋蘭縣屬自六月初間連降暴雨黃河上游遂漸泛漲至二丈有零河灘村莊二十餘處概被衝沒省城東南隅地勢極低適值泉水暴發橫過黃流關廂內外悉成澤國統計救出災民二萬餘丁口業經崧蕃委員散放急賑惟甘省向受黃河水利該處河灘地畝已成村落一旦遭此巨浸小民蕩析離居深堪憫惻仍著該督妥籌賑撫所有庫存正雜各款准其移緩就急以資拯濟該督務當遴委妥員核實散放盡心經理毋使失所以副朝廷軫恤災黎之至意○崧蕃奏查浙江寧海縣革生王錫彤聚眾焚燬教堂被害教士教民一案臣業將與法兵官訂款暫保護不力各員先後電摺奏陳參辦欽遵 諭旨督飭

供屬拿獲首匪竭力磋商甫於本年四月初旬簽押議結茲據調辦浙省洋務丁憂安徽候補道許鼎霖會同新授兩浙鹽運使前任寶紹台道惠霖將辦理議結各情形稟請察核前來湖查此案衅由寧海大澳利教民王品松爭輪管祭田其胞叔王廷錫斥其既不祀祖即不應管此項田畝該教民夫婦自知理屈投詞懇惠華教士朱國光出頭干預請縣拿究王錫彤聞之不平倡言仇教塑佛匠即陳阿三又名包良幹等振臂相助遂於八月初六十二兩日將王品松夫婦殺斃和者益衆十三日焚毀城內鳳潭兩教堂殺斃華教士朱國光教民羅仁壽李和中竺時香及不在教之胡建寅張禮元等一時人情洶湧附近城鄉各教民店鋪家屬多被焚搶迨至回大澳村巢穴業已聚衆數千竟圖負隅抗拒白巖寺匪僧禮釋復敢就近結黨爲之聲援甫經受任勸調防練各軍文武印委分頭彈壓保護復勘台防統領記名總兵王立堂督同剿捕攻入匪巢格斃匪僧禮釋悍匪周秀貴小王並不識姓名各匪追捕匪犯二十餘名內有王錫彤股匪葉崇清即明秀嶺賊有趙玉蘭暨禮釋夥匪王樹和章高成等五名情節較重經台州府知府徐成禮訊明供認或係執旗指揮或係進城焚搶屬實各予正法勅示以寒匪膽一面解散脅從懸賞購緝先後拿獲要犯塑佛匠即陳阿三王錫彤之子王幼生竺興觀李伴金竺才金王廷錫竺三元等去主獲首保祿因辦理認真頗知感激臣卽檄令許鼎霖帶同丁憂安徽候補知縣汪承祖馳赴寧波

會同前甯紹台道惠霖與趙保祿開誠布公相機商辦此案始則法兵輪赴甬意存恫喝繼則要挾多端開報失單索賠至三十六七萬之鉅頗難措手臣先將緝匪保教分所應爲諸事無不盡力爲之使之無所藉口然後再飭許鼎霖派委汪承祖親赴甯海會同副主教田法服按照失單逐款清查持其所短據理力爭許鼎霖才優識俗熟悉交涉復能不懈勞怨因應咸宜自二月開議赴滬赴甬屢翻屢議臣節據稟電隨時指授機宜相持三月之久始能定議計被焚教堂兩處被搶教民二百八十餘家被殺華教士一名教民五名統共賠償撫卹銀十萬兩臣察看情形委已督焦占做無可再減當飭該道等與趙保祿簽約議結現在甯海地方已一律安靖在逃首犯王錫彤仍勒限飭拿務獲懲辦禁錮各犯亦經派委會同地方官訊辦容俟核定情罪輕重再與應感文武各員另摺續奏竊維民教之衅大抵始於詞訟祖教則民怨祖民則教譁地方官聽斷稍有不平動輒釀成巨禍要挾卽因之而起是案王品松因田爭執事甚細微排解本極易易一經控究王錫彤等逞忿焚搶釀成交涉鉅案辦理遂諸多棘手幸賴駐京法使駐滬法總領事力顧邦交友誼電令主教酌讓始得和平議結雖例以浙省前辦各教案已覺挽回不少而動兵剿辦地方元氣已傷賠卹十萬所費亦復不細與其事後補苴誠不如先事預防臣已飭許鼎霖查照條約成案妥議善後辦法瞻諭周知俾得諸有遵守一面並飭在任候補同通州縣各員平日講求

約章研究交涉公牘俟二三月後命題屆試庶幾心目瞭然臨事不致茫無頭緒似亦標本兼治之計也下部知之○柯逢時奏廣西雖號瘠區而山林川澤之所產其輸於他省而取資於外洋者歲亦數百萬惟熟貨則絕無聞焉臣到任後尋求其故一由匪擾連年地方官無暇措意於此一由民情偷惰通都大邑無經商之輩亦無習藝之人凡日用所資皆取給於外來則其貧也固宜夫工商之業爲富國之本商之所資以轉運其源實出於工廣西河流險阻鐵道未通如仿東南各省之製造廠購置機器動費百十萬兩其勢有所不能惟有就本地所出爲民間所必需者專恃人工造作而必求其精則器以備而維新事以輕而易舉查梧州與廣東接壤招募教習出售貨物極爲利便候補知府程道元籍隸廣東前在梧州府署任曾經籌議及此當飭司道會議卽委該知府在梧先行開辦就裁缺之梧州副將蔣善酌量改建復於省城桂山書院新設一廠一律試辦計省廠藝徒三百名梧州廠藝徒二百名均責令各府屬縣挑選土著年輕及有身家者保送來廠藝成後卽發回各該地方充當教習以期逐漸擴充據程道元將現造之土布藤器竹器草蓆等項呈驗前來尙稱適用較之廣東工作無甚上下復飭該兩縣委員悉心訪查何地土產最多何物銷路最暢隨時改良實事求是總期本地多一製造卽開一利源民間添一工師卽少一游手於樂事勤工之中卽寓化暴爲良之意所需開辦經費暫由派辦政事處挪款濟用以資周

轉下所司知之○乙未諭朕欽奉 慈禧端佑康頤昭豫莊誠壽恭欽獻崇熙皇太后懿旨戶部奏內務府傳辦九江關磁器一摺當此時局多艱財用匱乏本年萬壽慶典業經 旨不准銷張所有傳辦磁器著卽停止○丁酉予江蘇陽湖縣孝女袁漪生旌表○戊戌調魏光燾爲閩浙總督以李興銳署兩江總督○調黃建筦爲山東布政使胡廷幹爲江甯布政使○辛丑 上詣 奉先殿 壽皇殿行禮○壬寅諭軍機大臣等有人奏西充縣知縣劉鴻烈禁屠滋事多斃人命並有酷刑收禁情事等語著錫良按照所參各節澈底根究據實覆奏毋稍徇隱原片著鈔給閱看將此諭令知之○曹鴻勳奏贛省練軍於光緒二十六年經前撫臣鄧華熙先後裁改歸併定爲中東西三路提鎮五標共二十四營餉章以三十天爲一關中路各營每關支餉銀二兩七錢練洋操者每關三兩東西兩路及五標營每關支餉銀二兩四錢二十八年又遵 旨改爲常備五營續備十六營巡緝彈壓三營薪餉仍照中路外路分別支發嗣因粵匪竄陷興義沿邊戒嚴先後添募防勇十九營四哨營制餉章仍以中路外路爲別均經奏明在案當時因款項支絀騰挪支展以紓餉力或就原餉稍爲增加或卽因仍舊制而改月爲關從前米物價賤尙可勉強食用自二十九年秋收減成米價日昂巨物因之騰貴兵丁皆苦餉不敷食外路各營駐防江上者亦因與中路薪餉兩歧時懷怏怏臣維贛省餉項甚微本不足資宿餉現因米貴兵艱饑疲藍綬

不堪困憊自非設法整頓則無用之兵徧於行間卽微薄之餉亦不啻擲之空壑。今督飭營務處善後局司道就現有人數餉數通盤核算擬裁去中路新中營新左營靖邊團營共三營祇留四十營又將四哨添練爲先鋒大隊減額加餉計每歲多增出款二萬數千兩而中外營哨官弁及什練等均稍形充裕以後督令認真操練亦不至有所藉口查奏定成案每營原設什練三百人今汰弱留強定爲二百五十人一營每營分中左右三哨每哨設正副長各一員三哨共計什長二十五名號令六名練軍二百一十九名其餉米均改闢爲月無分中路外路每什長一名月支餉米銀三兩五錢練軍一名月支餉米銀三兩惟常備軍五營練洋操者照舊加支三錢每什長一名月支餉米銀三兩八錢練軍一名月支餉米銀三兩三錢所有管帶哨長並弁教習文案册帳薪餉均照舊章按月開支中路先鋒大隊每隊設管帶哨長一員月支薪水辦公銀三十兩副哨長二弁月支薪水銀八兩哨書一名藍旌一名大旗四名月各支餉米銀三兩五錢號令什練八十名與文案册帳薪餉米悉照各營開支統計四十營六先鋒隊共設官弁文册哨書藍旌大旗等項共六百八員名什長號令練軍親兵共一萬零五百八十名每年十二箇月共應支薪餉米價銀五十一萬一千餘兩以原額所支之數抵銷實不敷銀二萬二千餘兩現正設法籌措除常備五營外其餘各營仍當逐漸推廣改練洋操俟教習足數分布卽當陸續開辦所有加餉屆

時再爲籌畫方今時事多艱練兵爲急黔又逼近西粵游氛正熾防不勝防臣雖暫攝疆符整軍經武刻不容緩此次改定餉章以銀數計每人不過數錢以關數計每年已多一萬所以軫恤兵丁優待將弁亦實不遺餘力現飭令自七月初一日起所有營制餉章悉按照新章辦理以歸劃一仍嚴飭統領各官經此次優加薪餉之後如再不激發天良認真訓練以致名額虛懸操防懈弛甚或有壓糧冒餉扣抵食等弊一經發覺輕則撤差參革重則欽遵疊次諭旨奏請軍前正法以肅紀律仍當隨時考查覈嚴並用務使資斧足而士皆宿飽技藝熟而人盡知兵以仰副聖主講武詰戎至意下部知之○癸卯外務部商部奏光緒三十年七月初九日准軍機處鈔交熱河都統松壽奏喀拉沁王請在該旗右翼巴達爾胡川地方華洋合股開辦金礦一片奉硃批該部議奏欽此欽遵鈔出到部查原奏內稱據喀拉沁扎薩克多羅都楞郡王貢桑諾爾布呈稱本旗前以邊地荒涼蒙民困苦請將本旗礦產自行次第開辦兩次奏奉恩准在案嗣因資本難籌未經試辦茲有荷蘭國商人白克耳願爲本旗承辦機器僱用洋匠擬在右翼地方先開巴達爾胡川金礦一處作爲華洋合辦股本各居其半一切遵章辦理擬訂草合同呈送核辦等情當查所訂合同與熱河及商部礦章間有未符已飭令更正並查明礦區係該旗藩地並無居民虛懸關礙一切均與定章相符惟該王兩次奏准原案均以自行開採爲請此次係屬華洋合辦

雖爲礦章所准行該王前既奏准有案應否准其照擬辦理之處請 敕部核覆施行等因並准熱河都統將該旗前次奏准原案及此次擬訂合同一併鈔送前來 臣等伏查華洋合股承辦礦務原爲奏定礦務章程所准行所訂合同間有與部章未符之處已准該都統來文聲明悉聽改定自屬可行惟查光緒二十八年間喀拉沁王與逸信公司華商孫樹勳德商俾爾福訂立合同開辦喀拉沁右翼全旗五金各礦前熱河都統錫良以全旗字樣有違定章奏請 飭部核議經外務部議覆行令熱河都統轉飭該旗將所指礦地劃清界限不得包佔全旗嗣准熱河都統咨覆轉據王旗呈稱此案既須指明地段逸信公司商人現雖並未來旗請預行備定一處地方名雞冠山周圍二十里請飭該商來旗試辦等語該商迄未來部呈請前往勘辦合同亦尚未訂定案懸莫結 臣等綜核前後情節喀拉沁王原將右翼全旗指給逸信公司開辦五金各礦經外務部飭令劃清界限不包佔全旗嗣雖預指雞冠山一處僅出自喀拉沁王一面之意逸信公司是否允願尙難預定若遽允荷蘭商人曰克耳在該旗右翼之巴達爾胡川地方開辦金礦將來難保不滋轄 事關華洋合辦礦務不得不慎之於始得 旨允行○甲辰 上奉 慈禧端佑康頤昭豫莊誠壽恭欽獻崇熙皇太后由頤和園還海○諭李興銳電奏福建龍溪南靖兩縣自七月中旬連日大雨溪河暴漲水勢漫溢堤岸衝塌十餘里田廬淹沒溺斃多命被災甚重覽奏深堪憫

惻業經李興銳派員散放急賑仍著該署督速飭各員設法疏消並趕緊妥籌賑撫務當核實散放盡心經理毋任失所用副朝廷軫恤災黎至意○丙午以黃忠浩爲江南狼山鎮總兵

八月丁未朔諭軍機大臣等有人奏浙江漕弊日甚吏治日壞請旨飭查一摺著李興銳按照所指各節確查具奏毋稍徇隱原摺著鈔給閱看將此諭令知之○戊申祭社稷壇上親詣行禮○達桂等奏江省現辦善後而經費一無所出就地籌款實爲目前要務惟地方向稱瘠苦當此兵燹之餘元氣未復欲求大宗鉅款急則易於緩則無及自非先就原有之釐稅兩項量加擴充使之簡而易行辦理雖期順手是以奴才程德全在京時於條陳善後事宜摺內即將擴充釐捐興辦山稅大概情形奏蒙聖明採納經部覆准正擬核辦旋因前署浙江薩保郵事未及舉行奴才達桂到任後又復和衷商推通盤籌畫欲求釐稅併舉仍使商民易從莫如用推廣之法而定以簡易之規查江省釐捐自光緒十四年經前任將軍恭鐸派道員陳寶善經徵呼蘭巴彥蘇蘇綏化各處煙鹽糧捐並秤貨五十二宗歷任因之然戰各省百貨並抽章程掛漏實多又嫌瑣碎略仿吉林辦過成法而損益之統曰實貨捐無論城鄉村鎮坐賈行商除肩挑小販不計外凡係實貨之家無論何貨每賣京錢一吊一律抽收制錢五文現已出示曉諭先就省城及蘭蘇林慶商賈繁盛處所設局開辦其餘城鎮村屯向無捐局者卽責成地方官代收不

必另設局卡以節經費如此變通辦理所抽無幾卽價值可無騰貴之虞捐錢出自買家卽商戶可無仰顧之慮此推廣貨釐之情形也至木植山貨皮張各稅曾於二十二年開辦惟庚子亂後經前署將軍薩保以收數無多奏請暫停當此款項奇絀未便以固有利權任其廢弛況省屬東西兩路產木尤夥自鐵路暢行銷路愈廣現已會商吉林以鐵路所需木植訂定兩省劃一章程昭示平允取信遠人其哈爾濱下游三姓所屬五站地方江省界內所產各物商明長江會辦俾免紛歧一面遴委妥員專辦本地運銷木植亦略仿吉林植百抽十章程實主完納一次無論運至何省何處概不再徵至於山貨皮張等稅改按舊日章程仍歸該局經理以期簡便如此分別辦理或於中外交涉兩省政治均有裨益此推廣木植山貨等稅之情形也以上兩項或量爲擴充或重加整頓均經奴才等悉心體察不敢以寬大沾譽尤不敢以搜括求功總期有利於國而仍便於民如果辦理得宜逐款加增再將收數若干及一切稅則局章詳細陳明懇 恩飭部立案以重國課而濟要需仰 奴才等更有陳者江省稅釐收數本不暢旺而旗餉清苦每借此爲補苴之計奴才等現在嚴加整肅杜絕中飽涸滴歸公擬俟試辦一年查核收數果能事臻成效擬請奏懇 天恩准將經收各員量加獎勵並優給津貼以砥廉隅倘仍安常習故泄沓相沿定卽從嚴參辦以挽頹風下部知之○庚戌 上奉 慈禧端佑康頤昭豫莊誠壽恭欽獻崇熙皇太后幸

頤和園駐蹕○以程鼎爲陝西漢中鎮總兵○諭軍機大臣等有人奏河朔會匪日益滋蔓隱患已深彰德府所屬林縣等處屢出劫案地方官捕務廢弛又奏河北鎮總兵郎桂林新鄉縣知縣曾恆祥聲名狼藉貪贖昭著各摺片著袁世凱按照所參各節確切查明據實具奏毋稍徇隱原摺片著鈔給閱看將此諭令知之○壬子裁撤內務府員外郎十缺委署主事十四缺六品司庫六缺六品庫掌六缺六品司俎官一缺上駟院委署主事三缺阿敦侍衛六缺牧長三缺武備院各項固山達三缺委署固山達八品催總一缺奉宸苑委署主事二缺圓明園委署主事一缺六品庫掌一缺六品苑丞一缺七品庫掌一缺七品苑副一缺八品苑副二缺委署苑副三缺頤和園六品苑丞二缺七品苑丞二缺八品苑副四缺委署苑副四缺○丙辰 上詣 奎先殿 壽皇殿行禮○丁巳諭溥頤奏請選擇合龍吉期一摺盛京 永陵 啟運殿等處工程將次完竣著欽天監於八月內選擇合龍吉期先行知照卽著該侍郎等敬謹遵照辦理該衙門知道○戊午 上奉 慈禧端佑康頤昭豫莊誠壽恭欽獻崇熙皇太后由頤和園還海○己未魏光燾奏承准軍機大臣字寄光緒三十年三月初一日奉 上諭商部奏據在籍翰林院修撰張謇條陳鹽業公司辦法擬變通鹽法設廠造鹽一切煎法運法銷法由公司稟請鹽政立案等語兩淮鹽課爲帑項大宗關係重要著魏光燾督飭運司將所陳各節妥籌議奏等因欽此當經飭司籌議茲據

署兩淮鹽運司恩銓詳稱兩淮鹽務爲東南財賦第一大宗舉凡京協要餉新舊洋欸取給於此者不下七八百萬之鉅當此財用匱竭如果運銷引數甚暢今滯課盤收數甚多今少自宜設法變通以求增益今考淮南鄂湖西皖四岸歷年銷數不過四十餘萬引上年極力整頓已銷至五十餘萬引淮北銷數亦增業據通綱票販認加新引五萬兩似鹽務方有通暢之機並非窒塞之會備變改成法未能確有把握公家每年千百萬固有之課釐加價設有短絀從何籌補又原奏修撰張謇條陳中有鹽業公司字樣查該修撰於上年六月間價買通屬呂四場商李通源恆產但請改名同仁泰垣並無公司字樣鹽務場運諸商各有花名非有票不得爲運商非有垣不得爲場商向來各垣場產商人集股收鹽皆以垣爲名張謇所辦呂四一垣應令循舊名爲同仁泰垣似無庸別立名目又條陳內稱設廠造田仿日本興鹽新法鹽丁聚處廠中難以偷漏鹽既無私墊於何有私墊則防於何有等語查淮南上色場分產數每多短絀鹽丁偷漏接濟私墊全賴隨時認真查緝果設廠聚煎使私墊無從偷漏產數加增亦屬善法無如海濱地廣到處有漁人人可煎似非設廠造田遂能盡絕私產第呂四一場本祇一垣已由張謇承買既因整頓額產擬仿日本新法設廠造田爲聚煎之計應由張謇自行試辦將來有無效驗再行考察惟條陳內所稱煎法運法銷法一切惟公司酌量更易稟請鹽政立案一節查兩淮鹽務以煎法運法銷法三項盡

之以煎法言如張謇現擬設廠造田卽係更易煎法但現辦僅呂四一垣則呂四一垣之煎法准其自行試辦若他場之煎法以及此外各商運法銷法應有定章事爲衆商所共未便更易等情詳請具奏前來臣查兩淮鹽法歷經前賢殫精竭慮著有成規近年所收課釐加價等項每歲約八九百萬爲江南大宗餉源卽鄂湘兩皖四省洋債賠款亦均賴此湊濟原未可輕議更張惟兩鹽現雖暢銷綱引尙多積滯如果得人經理因時變通設法改良試辦一隅無礙全局似當盡窮變思通之義以期補救今該修撰張謇請辦呂四一垣設廠造煎應令仍名同仁泰垣暫就呂四一垣試辦不必牽及他場亦毋庸別立公司名目得旨如所請行○庚申夕月於西郊上親詣行禮○辛酉以延祉爲西甯辦事大臣○以豐陞阿爲黑蘭鎮總兵兼內務府大臣○裁撤直隸巡道一缺理事同知二缺地方同知三缺河工同知二缺理事通判一缺地方通判三缺布理問一缺直隸州州同二缺直隸州州判五缺地方州判一缺河工州判五缺地方縣丞四缺河工縣丞十缺地方主簿二缺河工主簿十缺地方巡檢二缺河工巡檢三缺府倉大使一缺倉大使一缺開官二缺鹽大使一缺鹽知事一缺學正一缺教諭四十四缺訓導八十四缺○癸亥賞直隸津海關道唐紹儀三品京堂候補副都統銜前往西藏查辦事件○甲子上奉慈禧端佑康頤昭豫莊誠壽恭欽獻崇熙皇太后幸頤和園駐蹕○乙丑諭溥頤奏請擇吉恭請神牌還御

一摺奉天 永陵各工程現已完竣著欽天監敬謹選擇吉日預為知照屆期恭請 神牌還御○丙寅

諭前據御史王誠義奏參陝西鹽改官運害鉅利微及文武大員釀成重案各一摺當經諭令以舊確查
茲據查明覆奏陝鹽改辦官運各種流弊自應即行停止仍收加辦陝西候補直隸州知州李顯誠暴虐
商民欺朦釀禍儘先副將劉琦行同市僧縱勇殃民均著即行革職署按察使本任延榆綏道廣金清候
補知縣王榮綬主持官運擾利病民均著交部嚴加議處以示懲儆餘著照所議辦理該部知道○己巳
諭前據御史劉汝驥奏參庫倫辦事大臣德麟濫職營私各款當經諭令奎順確查茲據查明覆奏德麟
雖查無貪婪驕縱實跡惟辦事操切人地不宜著開缺來京當差蒙古繙譯色楞扎布招搖生事著即行
革職驅逐回旗嚴加管束餘著照所議辦理該衙門知道○庚午 上御乾清宮墨西番國使臣鄺華覲
見○命機壽為庫倫辦事大臣○辛未 上御仁壽殿議國使臣噶麟調帶領水師提督克雷由覲見○
諭中機大臣等有人奏浙江台州府知府徐承禮兼辦鹽運總局任用私人釀成教案等語著請緝藥按
照所參各節認真確查據實具奏毋稍徇隱原片著鈔給閱看將此諭令知之○壬申 上奉 慈禧端
佑康頤昭豫莊誠壽恭欽獻崇熙皇太后山頤和園還宮○癸酉調劉春霖為湖南布政使張廷燠為廣
西布政使張紹華為雲南布政使○諭前據給事中潘慶淵奏鐵路公司將京師正陽門外城根等處餘

地招商開設煤廠請將交納地租提歸戶部當經諭令商部順天府確查核辦茲據奏稱鐵路事宜多歸盛宣懷經理頭緒繁冗公司借用官地並未向外務部立案等語盛宣懷承辦路礦所用官地應納稅租並一切款項報銷均應隨時報部查核方昭核實著商部遴派委員前往會同盛宣懷將該大臣所辦路礦歷年出入款項確實查明詳晰具奏○貽穀奏光緒二十六年七月間烏蘭察布盟四子郡王旗有效尤仇教殺害焚掠之案迭經欽奉 諭旨嚴飭查辦當經前署將軍奎成前任將軍信恪以案情重大先後奏明派員詳查並札調該旗蒙員來綏議辦嗣因該旗延不遵調於二十八年正月經信恪奏請處分奉 旨將該郡王勒旺勒諾爾布交理藩院議處一面嚴飭迅速派員赴綏就議行令欽遵辦理去後旋據比國派辦教案委員林輔臣教士王達文呈請速催完案呈稱教民遭亂之後有誤耕種困苦異常請代求款濟急俟該旗賠款議定再行歸還由信恪咨請外務部先行指撥銀四萬兩轉付該教堂以應急需嗣經外務部咨由升任山西撫臣岑春煊就近借撥先後共借銀三萬兩由晉解綏一萬五千兩撥給該旗交付教堂以一萬五千兩撥給達拉特旗湊付償款是年五月間該郡王派扎蘭阿迪雅扎蘭扎木色楞扎布抵綏德使亦派其參贊大臣端貴前來歸化城經前署將軍文瑞督同現署黑龍江副都統前奏辦蒙旗教案之直隸候補知府壽勳於五月二十九日會同該參贊端貴比員林輔臣及教士蒙員開

議統全案命價財產等項該教士索賠銀二十餘萬兩經壽勳磋商減讓議定仇教禍首概免追究該旗認賠教堂銀十一萬兩由晉借款付過教堂銀一萬五千兩扣除外尚欠銀九萬五千兩訂明由二十八年六月起至三十年底止分期陸續交付於六月十一日書立草約合同署押完案惟賠款雖已議定該旗並無現錢擬以地租一項作抵教士堅不允從端貴等回京後亦以教民極困待款孔急為言請再撥銀一萬兩旋咨由外務部電商晉省復飭歸綏道在存儲庫購糧項下撥解銀一萬兩交教士賈名達如數收訖下欠八萬五千兩該主教教士屢次追索二十九年春間壽勳向該主教等再四懇商始允將所欠銀兩統以地畝作抵而該旗於奉到檄飭以後抗不遵辦亦不承認兩次代籌墊付之款任催罔應視若無干十月間奴才到將軍任後又派員嚴飭催交而該旗延宕如故經奴才奏請飭下外務部理藩院嚴飭遵辦奉旨允准札行復據派綏遠城協領榮昌察哈爾總管巴圖德勒格爾特文前往開導該旗始漸遵範並請寬限派員赴綏亦經奴才奏明在案本年二月已屆緩期該旗仍未將地畝讓交奴才復飭派辦洋務之山西卽補道申受培奏保知府斌儀等隨時催辦並向教士等往復婉商五月間教士字嗣安劉採靈與該旗商明願將地畝作價抵償計每地一畝作銀三錢亟請派員會收其前由綏借墊銀二萬五千兩就近於應收地內劃撥奴才卽派墾務委員刑部主事周祚麟候補縣丞吳棟葵等前往

該旗會同教士派員到地監視交收因青苗在地不便行丈經教士委員等商明限內教民於蒙中總收
草地一段勘明四至作爲三千六百六十六畝抵銀十一萬兩於此項地內劃出八百三十三
頃三十三畝作爲教堂歸還官墊二萬五千兩之數其歸入教堂之地該主教教士體恤蒙艱允給歲租
銀糧之後按畝計算歸還官款之地無租於七月十八日主教方濟仲教士宇嗣安劉拯璽易兆委員斌
儀等及蒙員齊集換立全案完結會同鈐印書押永遠遵守將前訂合同銷燬計四子郡王旗應給賠款
十一萬兩一律交清完案奴才伏查該旗因效尤仇教釀成巨案上煩 宸慮一再嚴飭速辦而該郡王
從前倔強抗違較各旗教案尤爲棘手追事經數任時歷四年始得告成奴才到任之日正值釀款發端
間不容髮當時雖在局外而周旋掙扎亦嘗爲之排難解紛及身任軍符更屬責無旁貸今幸賠款辦結
蒙教照舊相安奴才仍當隨時勸導防維不使再生衅隙用副 聖主修好睦鄰之至意下所司知之○
貽穀奏伊克昭明準噶爾旗於光緒二十六年間亦有仇教殺掠之案疊經前任將軍派委現署黑龍江
副都統前奏辦教案之直隸知府壽勳會同法國主教閔玉清比國總教士賈名遠教士南懷義議辦於
上年二月議定免懲禍首亦不索賠罰由該旗認給教會撫卹銀二萬九千兩公立合同書押鈐印在案
嗣因該旗非常貧苦籌措甚艱懇請變通辦理以翟林窩子噶布爾河頭等六村已墾地三百頃作抵業

經教堂應允十月間奴才到任後兩次派員前往丈交查知該處地戶承種地畝業已數世一旦驟令遷移殊覺流離可憫該教士等復以地多磽瘠不值所抵之數欲於三百頃外再行加添而該旗生計甚窘無可撥補復經委員商之教士擬令該民戶每年出租銀二千五百兩給予教堂逐年抵扣奴才詳察該地向無如此重租此次雖事屬權宜求為消弭鉅案然因教會而徵通屬戶以後恐官民交累難免有意外之虞且教士持增地之議甚堅不如乘此時別籌良策因飭辦理洋務委員奏保知府斌儀歸化廳因知樊恩慶等約教士輩員熟商將所呈地畝歸官由墾務局籌給現銀了結該教士等欣然樂從又以得銀勝於得地念奴才委曲調停之心情願減讓銀二千兩祇收現銀二萬七千兩分為三期籌付限本年十一月三十一年九月三十二年三月各交歸化城平銀九千兩書立期券屆時由主教閱主清派教士親持向將軍衙門分次照數領取分同先詳草約由主教教士委員等各簽字畫押俟款項交清即將草約並前立合同一併銷燬其該旗歸官地畝擬派員丈收後仿照遠拉特旗四成地辦法由墾務局分別等則照戶領種收回地價將來升科後應徵地租由托克托城廳按年徵收惟該處地畝不佳放給民戶能否收足原價殊難預定奴才為連結教案兼恤蒙艱起見不得不如此通融辦理應俟實收再行結算下所司知之○甲戌歲給普濟堂功德林煮粥米石

光緒一百八十九

臣朱壽朋敬編

臣章士璣恭校

九月丙子朔 慈福端佑康頤昭豫莊誠壽恭欽獻崇熙皇太后 上御 慈禧端佑康頤昭豫莊誠壽恭欽獻崇熙皇太后幸頤和園駐蹕○

領水師提督譚威勅覲見○上奉 慈禧端佑康頤昭豫莊誠壽恭欽獻崇熙皇太后幸頤和園駐蹕○

諭巡視中城御史賈秀等稟請賞外城粥廠粟米開單呈覽一摺現在節屆寒令五城地面貧民生計

維艱所有中城之玉泉庵東城之育嬰堂西城之磚塔胡同北城之圓通觀梁家園各粥廠每月共需米

二百四十石加恩照數賞給自十月初一日起由各城咨明戶部札倉給發該御史等務當督同紳士妥

為散放毋任侵漁單併發餘依議另片奏請賞給崇善堂等處米石等語崇善堂等處各廠收養貧民人

數衆多米石不敷支放加恩著照所請所有南城之崇善堂北城之公善堂海甸之掛甲屯粥廠西城之

禮拜寺宣武門外之西悅生堂各賞給粟米三百石南海會寺玉清觀興善煖廠清真粥廠各賞給粟米

一百五十石又北城捐設之繼德堂同德堂粥廠各賞給粟米三百石翼善堂之教養局著賞給粟米

三百石以惠窮黎○丁丑潘效蘇奏新額每年原分協餉二百四十餘萬均係計口授食之需自二十六

年參匪肇畔各省關祇解到銀一百七十八萬餘二十八年亦祇解到銀二百五萬餘認賠款一項前任撫臣饒應祺誤作一年認解銀四十萬兩並未慮及逐年攤解之難內地協餉既不足數復添此賠款四十萬以入抵出益形拮据而新疆地方遼闊兵力太單不敷分布又未敢輕議裁減於是每月祇發兵勇現餉二十日扣存通計每年發餉八箇月欠餉四箇月存餉日積月多終無了局而各兵勇原定坐餉每月三兩大錢扣發十日祇得二兩四錢邊地百物昂貴食用不足怨譟迭興譁潰勢所不免臣於二十八年蒙 恩補授斯缺由甘入新沿途兵勇求發欠餉情詞急迫經臣剴切開導俟到任後設法清釐尙無異言迨抵省接篆之次日饒應祺定於辰刻啟程省城兵勇紛紛聚論欲攔輿索餉語多無狀復經臣再三傳諭無論欠餉若干均惟新任是問但不得聚眾譁譟致干軍律各將領亦多方勸誠諸辭乃恩饒應祺延至申刻始得出城旋傳藩司查問庫存餉銀五十餘萬兩積欠營餉銀一百二十餘萬臣與司道將領反覆籌商苦無善策內地協餉解不足數本省又無款可籌今欲清償舊餉滿發新餉舍裁兵別無辦法然新疆與內地不同疆域廣遠糧糈難且喀什伊犁塔城駐兵太少不足以資彈壓況一議裁汰各兵勇皆關內之人若不妥爲安插資遣歸籍必致流離滋事有此數端無怪乎前任之不議裁兵祇圖短欠暫顧目前之急也臣初蒞任卽值此艱窘萬分之際通盤籌畫分別緩急輕重與其留兵不裁禍鉅且

速不如決意裁汰督飭地方文武嚴防地面整頓營規或可消患於未形定議後卽通飭於提鎮協各標嚴加裁汰截至二十八年底止查原存員弁勇夫三萬二千餘人內車夫馬夫子藥馱夫棚夫私夫火夫八千餘名正勇火勇二萬四千餘名此次裁汰老弱挑選精壯凡步隊四百餘人一營者挑留正勇二百人三百餘人一旗者挑留正勇一百六十人馬隊一百二十餘人一旗者挑留正勇五十人其餘各項營夫亦隨同正勇分別遺存所有裁汰之兵願留新者存餉如數發給並發恩餉一月由各營旗官按名分起包領因連兵並餉就近送交各地地方官按名點驗凡種地者交農約保領貿易者交商首保領作藝者交行頭保領不服約束流蕩無歸者以游勇論其情願歸籍者存餉如數發給恩餉發至到籍之日止自出營日起派員分起管解按日發給餉銀送至嘉峪關內肅州道散仍扣算到籍站程應發餉銀若干交肅州牧點驗令其自行回籍並造冊咨明陝甘督撫提鎮轉飭沿途文武嚴行稽查以弋滋事至挑留之兵自二十九年正月起按名按月發給滿餉極力整頓務期一兵得一兵之用惟偏員周二萬里留兵無多又皆祇發坐餉僅能專顧城防卡隘及護送餉裝人犯諸事設南北兩路一旦有警仍苦無兵調撥自不得不預爲籌備除省城原有衛隊兩旗左右兩翼練軍馬隊六旗親軍礮隊一哨均未敢更動外復將新字營步隊一營全數裁改並在各標遺勇內挑留精備前左右後五營每營四百人共二千人照

坐餉章程議爲加增以中營駐省城前營駐喀什左營駐阿克蘇右營駐伊犁後營駐哈密隨時操練以資游巡而備徵調又於省城設巡警兵一營凡四百人其餘各府廳州縣相度城關之廣狹戶口之繁簡以定巡警兵之多寡五人爲伍大約極繁極寬之處以十五伍爲度其次以十伍爲度又次以五伍爲度現據報辦成者已六百人以上標防巡練各軍馬步合算除各項營夫外原存正勇火勇二萬四千餘人裁汰正勇九千餘人其火勇一千六百餘人全數裁撤共祇挑存正勇一萬三千餘人均勻布撤嚴密巡防自上年春季起以迄今日辦理一年有餘差幸地方安謐宵小潛蹤西南北三面交涉繁多亦幸相安無事均堪仰慰宸廑刻下庫存五十餘萬雖已用罄然去今兩年兵勇均發滿餉不獨新欠未增而舊欠一百二十餘萬亦已清償過半向使拘守地關兵單之說不早設法變通評議情形實有不堪設想者矣惟念新疆轄地之廣處置之宜兵力不可不厚以餉項奇絀而論自應體察情形量爲騰挪以期斟酌盡善爲今之計欲增兵減餉惟有挑選土著中之精壯者編入行伍束以長法給以羊隻地畝旗籌屯牧以爲養兵之具無事則盡力開墾有事可備徵調職屬管子內政寄軍令之意名曰常備世襲兵與續備巡警各軍相輔而行既於邊防有益復於軍制相符臣上年奏請恩借洋款遣散客兵改練土著嗣因洋款恩重未借按准戶部電覆全就現有之餉勻撥辦理在部臣洞悉邊情體察辦事苦衷不以文法相繩

臣此次裁汰老弱節省之餉除挑留之兵應均發給滿餉不再出在外就欲通籌挪解賠款又欲陸續清償舊欠及舉辦常備世襲兵三者並力經營勉為籌顧謀十世之利即使各省協餉如數如期解到仍不免有左支右絀之勢若因裁汰老弱遽議減撥餉銀有法仍不能行是新疆終無自主之日矣應請飭下戶部將各省協餉照舊指撥俾臣得以稍事通挪從容展布臣不勝悚惶待命之至將來一切用款容俟另案據實造報不敢稍涉虛浮致乖實事求是之義騰公家之餉練公家之兵但於邊疆有一分之益即當盡一分之力臣非敢妄事變通致違舊章也下戶部議奏○戊寅諭理藩院奏敏珠呼圖克圖因驟熱在多倫諾爾地方圓寂一摺敏珠呼圖克圖駐京年久經卷亦甚嫻熟茲聞圓寂朕心深為悼惜加恩著賞給手串一串銀三百兩五十兩重銀曼達一箇大哈達一箇小哈達一百箇香四束所賞物件交該院轉交伊徒蘇喇嘛喇什齋回○張之洞奏目前自強要政莫急於練兵而練兵以製械為先製械非籌款不辦臣於上年十一月 陛辭出京時面奉 皇太后懿旨詳詢湖北漢陽鎗礮廠每日每年所出之數臣當經詳晰奏陳 聖意以出械尚少諄諄以擴充製造為訓跪聆之下欽悚難名況值此邊患日深軍械未備夙夜焦勞應欽遵妥籌辦理臣於本年二月回任後即督飭該局司道通盤籌畫力圖擴充以鄂廠現有造鎗機器每日出鎗五十枝機器力量已盡無可再加通年出數僅止一萬五千枝實不

足以供數省之用當此時勢極爲可憂必須添機多造至鎗彈一項尤宜多爲儲備有事時方不致鎗爲虛器原有造彈機器連去冬續行訂購之彈機併計每日出數至多不過四五萬顆今鎗機既添則彈數愈形不足尤爲兵家大忌斷斷無此辦法若欲擴充製造必須添配鎗機尤須酌添彈機惟鄂廠經費本屬不敷茲擬添製大宗鎗械彈藥非有經久確實之款萬難集事查本年二月准政務處咨會同練兵處議覆前兼署湖廣督臣端方升任湖南撫臣趙爾巽奏請於湘省地方合力籌建鎗廠一摺政務處原奏內開湖北鎗礮廠每年製出之鎗械尚嫌所造不多推原其故仍是款項不足不能多聘良匠多購新機加意請求以臻完備湘省近與接壤自應先行設法維持使鄂廠款項充足製造精進因已有之成規宏軍儲之製作便孰甚焉等語是鄂廠必應添機多造及鄂廠經費支絀情形早爲政務處練兵處王大臣所深悉惟欲借資湘省設法維持屢經調商未允此係斷斷必無之事查湖北歷年整頓土藥稅捐本奏明專爲供濟鎗礮廠之用前因新案賠款無著於光緒二十八年正月復經奏明籌辦膏捐以資湊解賠款及自強要政之需當經奉旨俞允並飭妥爲辦理欽遵在案上年冬間經前兼署督臣端方與浙省定議合辦土膏統捐除扣存原徵之土藥稅釐膏捐等項歲計較有增收原議以增收之款統歸兩省合辦之湘省鎗礮廠濟用現經政務處練兵處議駁鄂省自應另籌辦法改就漢陽鎗礮廠盡力擴充至經

費除土膏統捐增收之項別無可以挹注當查光緒二十八年湖北開辦膏捐原奏本係聲明添湊自強要政之需竊謂自強要政莫過於練兵製械雖政務處咨以原奏謂鄂省與湘省合辦既無偷漏之虞卽有增加之數亦應另欸存儲以備練兵處提撥等語夫既責以擴充卽宜增其經費若本省籌辦之欸尙不能歸入製械之用將何從多購新機何法可臻完備乎且練兵之與製械事本相因有兵無械與無兵同兵多械少與無械同有鎗礮而無彈藥與無鎗礮同將來鄂廠出械日多卽可以備練兵處提撥之用供練兵處之械卽與供練兵處之餉無異至京師練兵處餉項已遵旨將派撥之項認解足數并已多爲籌備此項土膏統捐溢收之餉歸湖北者除大宗湊齊新案賠欸外如有盈餘擬卽儘數撥充湖北鎗礮廠添購新機添造新廠及添備物料工本之需此次統捐溢收今年甫經試辦爲數尙難豫定總之不能甚多斷不敷添機添廠之用所差尙遠此外仍應設法籌措隨時奏明辦理惟購機安機出械周折甚多而時勢危迫繼日待旦猶恐不及故添機造械之舉萬難猶豫延緩以致坐誤光陰臣現已一面訂購新機一面設法多籌欸項迅速趕辦合無仰懇 天恩俯念軍儲緊要急須擴充鄂廠費絀用繁准照二十八年奏准原案 俯如所請將鄂省溢收土膏統捐餘欸撥歸鄂廠以資添補要需實與中外練兵要政均有裨益時局幸甚再鎗礮廠內分廠林立廠各有名非鎗礮二字所能包括查日本製造鎗礮

之廠名曰礮兵工廠較爲簡要現擬改稱爲湖北兵工廠以昭核備合併陳明得旨如所請行○癸未大學士敬信以病免賞食全俸○陳夔龍奏豫省許州所轄之繁城鎮地方瀕臨潁河界連數縣舟車輻輳水陸交衝素爲商賈會萃之區五方雜處防範宜嚴近日鐵路開通毗連鎮境保護尤關緊要該處距州城三十餘里鞭長莫及照料難周查有該州判向旺同城事務無多若將該州判移駐繁城鎮俾得就近稽查彈壓實於地方鐵路均有裨益等情據許州直隸州知州潤芳稟由布政使瑞良按察使覺羅鍾培會詳請奏前來臣維設官分職要在因時制宜該司等所請係爲慎重地方起見似應量爲移置將許州州判移駐該州繁城鎮以資佐理如蒙俞允該州判廉俸役食一切均仍其舊無庸另議至應建衙署現在籌款維艱卽令暫賃民房棲止下吏部議奏○甲申慈福端佑肅頤昭豫莊誠壽恭欽獻崇熙皇太后御仁壽殿德國使臣穆默帶領德國巡撫都浦祿觀見○訓榮慶爲正紅旗滿洲都統以督耆爲鎮黃旗蒙古都統○丙戌諭朕欽奉慈福端佑肅頤昭豫莊誠壽恭欽獻崇熙皇太后懿旨本年十月初十日萬壽在頤和園卅聖殿受賀在外之公主福晉命婦著照例行禮是日宣表行禮朕親遞表文所有應行禮節著該衙門敬謹預備○裁撤河南通判四缺州判二缺縣丞六缺巡檢一缺復設教諭五十七缺復設訓導四十七缺○戊子追子故直隸安平縣知縣龔詩漢列入國史循吏傳○庚寅增祺等

奏奴才增祺遵委海龍府知府孫壽昌總辦行局事件於光緒三十年二月二十三日率同在事各員赴
圖接辦等情奏奉 硃批知道了欽此轉飭欽遵去後茲據孫壽昌於八月十五日回省稟報全圖應辦
事件一律完竣奴才等覆加查核自上年八月十八日奴才廷杰親督赴圖開辦之日起至本年八月十
五日據報完竣之日止所有欽遵奏定章程十條應辦各項事件並條分縷晰敬爲 皇太后 皇上陳
之一定章以廢鎮開荒山場折補有照無地之戶查前局驗收無地之照及此次補報驗收者共二百六
十三張計應撥地三百方有奇當將各國丈出無主荒地及廢鎮山場按照旗畝數均勻搭配續發撥倘
當堂聖撥派員領赴地所見地卽領者固多而間有嫌地瘠薄不領又不肯領回原價者亦不少計先後
聖發五次始撥補完竣放剩之地亦陸續合行丈放一私墾山荒貧民見有准領章程均各備價聽候丈
放乃有並未私墾妄指他人墾段報領者亦有佃種他人之地反客爲主以報領者每至一段紛紛控爭
當經調查執照實之地鄰證以鄉保逐起查明將顯奪各戶驅逐出圖而貧民始得各領各段各安各業
其無主山場皆依次丈放完竣一定章樹川每畝作價四兩計已收樹川銀條合銀三十一萬兩需樹川
地三百餘方始敷撥放惟西流樹川開時已久斬伐殆盡恐有不敷撥以東流樹川移撥奏奉 硃批戶
部知道欽此茲據行局呈報本年新丈連上年已丈各國所有樹川除遵章撥補收回樹川銀條外計尚

餘樹川地一百四十四方零十九畝三分奴才等伏查放剝樹川地多在山脊定價既昂招領非易擬飭西鹽西安兩縣嚴禁樵採妥爲看守俟培養數年再行勘辦其東流樹川應請勿庸移撥一西鹽西安兩縣城基除已交荒價領有執照及臨丈報領每畝收價二十兩均照章撥放外計西鹽尙餘基地四百十三畝六分三釐按尙餘城基地一百八十七畝六分八釐六毫或地稍荒僻不近市廛或地屬下濕不堪建造是以承領無人擬請將所餘地畝仍作兩縣官地准其招佃繳租以爲歲修城垣衙署等項之費年終冊報查考一定章城鎮基每畝收荒價銀二十兩查考虎嘴子礮手堆子房木溝等鎮基除有指領執照各戶照章撥放外所餘基地無人報領緣考虎嘴子卽安空鎮暨礮手堆子均隸西安縣距縣較近木溝隸西鹽縣地非通衢竊恐難成鎮市久且與正段無殊但比尋常正段較爲膏腴自應變通損益每畝酌收荒價銀六兩現已一律招領完竣一定章珠湖圖上等地畝收價四兩中等三兩不及中等二兩除原領二十七方外餘均遵章丈放惟該圖山荒按前局舊章膏腴堪墾之上等與無不可墾之中等無甚區別今量爲變通上等山荒實係膏腴者提歸正段分等收價其餘山荒一律作爲中等每畝收價一兩至下等難墾卽現章留作樵採牧養之地自應照章嚴禁私墾以歸劃一現據分段查丈清楚除酌留學田並據補該圖空照外其餘地儘數歸該圖原佃報領山荒除提歸正段暨撥補前局交價收單並毗

連執照外亦均准原戶領回該戶意外得地交款踴躍異常籌款便民兩有裨益一定章西盤西安兩縣學田由珠珠湖圍租地內酌提茲既准原佃報領未便多留僅由該圍留上等正段地五方爲西盤縣學田可聖山荒五分劈分兩縣學田各半其西安縣學田由扎拉前阿林圍撥給正段地五方飭各該縣招佃議租仍收租項用款年終冊報查考一各圍地戶弊竇百出竟有奏定章程十條所未備載者不得不隨時推廣如得地失照有地無照之外又有以彼圍執照私佔此圍地所之戶既係私佔自應撤地而地已開墾未便遽撤於是酌定徵價接算之法照每畝一兩二錢章程除已交荒價三錢三分外每畝補交銀八錢七分仍准承辦既不沒其開墾之勞亦足杜其私佔之弊一圍地既經合放領戶益多佃戶亦衆當遵奏定章程分別圍之大小各酌留義地札飭該兩縣覆諭各圍鄉保經理俾寄籍之人可資墾葬一全圍地畝糾葛新舊各案其提至省局訊明奏咨完結者一起呈送到局訊照完結者一百二十起各分局隨地隨時訊結呈報有據者六百八十六起歷年結贖爲之一清一百姓從此得安本業現經廣成海龍府知府孫壽昌督率各縣隨時清理詞訟以保富庶一前盛京將軍依克唐阿奏請弛禁圍場一摺內稱八十五圍仍可開田五百萬餘畝蓋兼指東西流水而言戶部議奏摺內亦稱以全圍可開田五百餘萬畝論其畝數亦當過半若尋指西流水而言今西流四十五圍內除不堪耕種山荒照章留作樵

採牧養外共得正段山場城鎮基草甸等項地二百九十八萬五千餘畝核與開辦之初約計之數尙屬有贏無絀一各項地價經費約共續收銀一百萬兩有奇自奴才廷杰上年開辦之日起自本年秋收之日起已收銀八十七萬四千四百九十兩七錢五分四釐五毫六絲五忽經奴才增祺提用銀四十九萬九千三百八十九兩七錢六分五釐六毫一絲五忽除欸分存股號號商未放之欸俟行局收支處掃數收竣再行奏報現在時局艱危釐稅來源已竭奴才增祺籌餉籌賑智力俱窮幸賴此款藉資挹注擬請掃數截留一西甯西安兩縣應徵錢糧以此次所丈各項畝數爲定除學田義地官舍等項免徵外其餘統按正額二分耗羨一分計之每歲又徵正額銀五萬九千餘兩耗羨銀二萬九千五百餘兩惟圍地有未經開墾之處仍應照章三年升課又有五年升課之草甸是以應徵錢糧俟清冊追齊再行詳核咨部立案奴才等查西流蘭荒立法之初未盡善美以致輾轉糾纏迨至七八年之久而又中遭兵燹案卷焚燬無存枝節日甚辦理之難有知之而不能言言之而不能盡者經奴才等遵照奏定章程十條督飭各員逐件清理雖所辦各事不止以上數端然大要亦不出數端之外仰蒙訓示周詳得以次第就緒覓觀厥成足以上慰宸廑下戶部知之○貽穀奏綏遠人民素稱循謹惟毫無強固憤發之氣大都爲口外積習所染疲弱不堪八旗二十佐二千馬甲七百步甲六十三員升察其真無嗜好者不過十之三四

若不嚴加整頓日復一日將盡人皆病疾而不可救藥奴才到任後諄諄戒勉期於更新復於揀選差缺之中隨寓勸懲之意俾知嗜好不去向上無由勢不得不爭自洗濯現在常備馬隊各軍武備各學生幾經更換始覺壯觀其閒散兵丁亦未便聽其游惰已於奏開之綏城牧廠酌留屯地擇官長之稍知農事者督之耕作使其習勤庶可漸望轉移此培植根本之情形也口外民戶不講蓋藏一遇薄歉偏災往往室爨懸罄綏遠係滿洲駐防之地八旗官兵皆如客籍俸餉之外生計毫無每遇事畜之艱何有蓋藏之術今綏餉按季由京請領萬家口食仰給他人萬一撥解愆期或偶遇事變有坐困而已奴才慮及意外未雨綢繆幸值上年口外豐收糧價較平得以籌辦積穀每於發放米折之月勸導該處各官兵由領米折銀兩各積款內陸續購備現已積有倉米六千石按年出陳易新足資利賴此籌備緩急之情形也興學練兵尤關緊要前經調任將軍信格奏請於各項兵丁內選其身體強壯者三百名均補馬甲之餉作為常備軍延致教習改練新操並擬將本城步隊官兵每年應支津貼銀七千餘兩歸入該軍以資養贍教練一年期滿改為續備裁去津貼仍給馬甲餉銀另選三百名充補常備迭相交代歲以為常係因別無餉項可籌姑作連成舊續之望奴才體察情形教練之期既迫練必不精以綏遠風氣未開人安愚拙習又難推行甲有定額不能於額外增添若相機坐補不數年而甲缺盡矣非設法變通何能持久信

恪原擬就綏遠書院改設武備學堂挑學生六十名亦均坐補馬甲之餉卽飭由該掌教爲之講授有用諸書另延教習訓練操法亦係因舊增新聊資節省之意惟該書院規模較小不敷武備學堂之用奴才現將空閒旗署一所改作武備學堂卽以武備學堂騰出之書院改建中學堂其從前書院經費亦歸爲中學堂需用不敷之數由奴才倡領八旗官兵認領綏遠牧廠地共三百四十餘畝俟招佃得租作爲津貼中學堂經費復設立蒙養學堂挑選八旗子弟分途教肄以備入中學堂之選此已經籌辦而尙多未盡者也兵學兩事不難於擴充而難於籌款信恪改練新軍及興辦武備學堂指由旗庫存儲兵丁各本身照例坐扣加添駝馬價銀一萬一千餘兩先行動支以後俟綏遠牧廠墾放卽以所收押荒租項作爲常年經費查此項馬價銀兩奴才到任時業經告匱而牧廠墾務復以地方礮薄認領寥寥故雖有涓滴之儲難資接濟現在常備軍僅有步隊津貼一項暫資應用至武備學堂毫無常款可用難資空拳惟查該軍兵隊及武備學生今已教練年餘於各項操法頗爲精熟停之可惜奴才惟有暫行先後設法籌墊勉與維持仍一面妥籌久遠的款期在必行凡事不辦則已辦則必求臻美備有兵無械與無兵同械不精與無械同綏遠舊存鎗械均係土鎗無可操用且自庚子以後工部火藥已空無復赴京請領故一應急需利器非另行購備不可所慮需款甚鉅籌措良難現雖備有萬金不敷尙鉅查察哈爾左右翼墾務

所收逾限罰款一項前經奏明歸入東路墾務公司股本擬俟股本收回儘數提歸綏遠專爲購械之用不勦正款而有濟要需此應行籌辦而尙多未盡者也綏遠地居邊要爲直督邊防之後路更爲烏科轉餉之後路西北一帶防守空虛雖有常備一軍尙須及時操練未便卽令分防所恃巡防之用祇此馬隊二百名以蒙地教堂林立保護彈壓實屬不敷分布加以外人游歷月有數起導送保衛疲於奔命在平時已虞不支倘遇有事之時何堪設想卽如春間河套之役奴才派隊防剿調遣及於武備學生窘迫可知本擬添練數旗以供遣派而現有之隊尙以餉項不給爲憂何有添練之力審時度勢不敢視爲緩圖而又不能不暫從緩議此又應行籌辦而猝難辦理者也奴才尤有請者綏遠本瘠苦之區衝繁之地而將軍統轄東則調遣宣大二鎮西則控馭烏伊兩盟體制既崇一切因公之費自難概從簡略然向無辦公之款將軍一缺歲僅支養廉俸銀五百兩及米折人役工食草豆等項一千一百餘兩統計不過一千五六百金應領之數比之州縣簡缺尙不及半何以敷用此外尙有陋規無非取諸兵餉節壽年復一年遂使旗兵日卽貧弱一至於此奴才到任已盡裁之但裁汰殆盡流弊愈滋近來蒙旗開墾交涉頻仍較前尤多繁費若不預爲籌及以後食者更有所藉口廉者亦不能久任將使綏遠旗務有日敝一日者其歸化副都統情形亦復相同奴才長慮卻顧不敢因現居綏任避嫌不言查察哈爾副都統前因辦

公竭誠曾由直隸督臣奏添公費三千六百兩奉 旨允准奴才亦擬懇 恩准予仿照辦理緩達城將

軍擬歲加公費銀三千兩歸化城副都統擬歲加公費銀六百兩庶可辦事從容免致掣心於日用至貧

弱旗兵元氣可復更無論矣此項銀兩擬卽於 奴才開辦西盟抗達兩旗之渠地租內分別撥用仍期不

動庫儲如蒙 俞允應俟租收暢旺再行撥年支領屆時奏派 奴才爲有裨辦公起見用敢陳情他若裁

無名之費節不怠之需修葺城垣而不支公帑提倡工藝而藉挽頽風發餉則弊混悉除選缺則箭鎗並

試用人每資於稅務交涉不必有專員凡有可裨益綏旗之事 奴才自應竭力圖維以期仰副 聖朝振

興庶務之至意下戶部知之○癸巳命候補三品京堂張振勳爲考察商務大臣並督辦閩廣農工路礦

事宜○達桂等奏江省地方公事向歸旗署承辦自創設邊軍開墾荒地始設有文案營務糧餉各處嚴

荒招墾兩局分理各事承平之日尙惜風氣未開人安固陋凡事祇顧目前及庚子一變局處停止百務

益以廢弛綱紀因之蕩然矣 奴才適承其敝原擬就地取才督同旗員與之更始無如泄沓相沿激勸均

無所施萬難因循瞻顧就現辦情形酌量改添局處分任責成或可望日起有功查墾務一事省城原

設設荒墾務總局現在奉 命開放各荒若仍將三蒙及省屬各處每放一荒在省立一名目不惟經費

過繁必至意見雜出今擬稍事變通將蒙荒招墾兩局歸併一處名曰墾務總局專辦通省墾荒事宜庶

可節虛糜而免歧異瑣務而外所最要者厥惟善後江省向稱荒陋而又遭庚子之亂自以開物成務敝起衰爲當務之急查各省兵燹之餘皆設局辦理善後綱舉目張條理秩然最爲美善黑龍江整頓舊規創行新政尤應有總匯之區以爲異日擴充張本現設善後局一所凡財政清訟學堂巡警團練保甲採訪忠義撫恤難民等事以及應興應革各端統歸籌畫辦理俾事權歸一綱領可循其營務一處卽同時並設雖亂後零星漢兵三千餘名然散漫無紀實無以爲緝捕之資有此一處逐漸整飭操防或望起色至於文案處爲庶政所從出實通省行政樞紐興替所關最爲機要從前邊防文案係專爲軍事而設名同事異因亂久停若山各司承辦又輾轉需時動多洩漏今特參仿吉林課吏局奉天文案處辦法兩署會設文案處一所一切政令文牘皆取辦焉事則將軍與副都統兼資人則投効與土著並用既無畛域之見且杜門戶之嫌以上兩局或改設或添設均係體察現在情形萬難再緩已遴委委員分別開辦奴才等撫此彫殘非不知籌款維艱宜從節省特以受恩深重不敢敷衍了事與其因仍舊習致誤邊疆何如稍事變通有神時局惟創辦伊始各局處章程一時未能詳盡容俟辦有端倪再行詳細奏聞下部知之○中午諭軍機大臣等聞直隸之大名順德河南之彰德等府及山東之東阿縣一帶均有會匪嘯聚多人散布謠言以仇教爲名煽惑生事如果屬實亟應嚴切根究及早拿辦以遏亂萌著袁世凱

周緞陳夔龍迅速督飭地方文武各官不准諱飾趕緊嚴密查拿分別懲辦並將各處教堂人民財產認真保護毋得稍涉大憲致有疏虞是爲切要○乙未外務部奏臣部於光緒二十九年九月初五日准出使美日秘古國大臣梁誠咨稱光緒二十六年中墨訂立條約奉 旨批准互換華人去墨日益衆多上年華商創設輪船公司往來中國美墨各口墨國土地肥沃外人向邀寬政今該國於華人漸肆凌虐於輪船公司又事阻撓疊據寓墨商董先後稟訴若不設官保護無以慰僑民呼籲之忱至設官辦法請援照古巴成案卽以總領事官兼充參贊平時駐薩里那古盧司海口遇有與外部商辦事宜聽其馳赴都城常年經費需庫平銀二萬二千兩開辦經費庫平銀四千兩儘敷足用在經費支出無多在華僑受益甚大擬陳辦法咨請察核等因前來臣等查駐美使臣兼使日斯巴尼亞及秘魯古巴等國均派有參贊領事等員分駐各處墨國甫經訂約尙未議及設官近年寓墨商民日衆交涉漸繁既據該商董等稟懇設官自應急籌開辦俯遂輿情該大臣擬設總領事官兼充參贊平時駐劄海口遇事馳赴都城實於保護華僑有益應准其添設惟駐美使臣業經兼日秘古三國今後增設墨館事務較繁慮難兼顧亦應量爲變通查日國地處歐洲距法甚近與美國中隔大西洋程途絕遠溯當遣使之初因古巴屬日是以駐日分館由駐美使臣兼理現古巴已認爲自主情形迥非昔比自當因地制宜擬請將駐日分館改歸駐

法使署就近兼理所有派員駐蹕一切事宜卽由出使美國大臣籌辦如此量爲轉移於使務既可裨於情形亦爲利便至所需經費查日館常年銷冊歲銷一萬六千兩嗣後卽移撥此款抵充聖館常年之用其開辦經費四千准其另款造報日館事務較簡應派參贊暨隨帶繙譯一員足敷辦公毋庸再設洋員以期撙節其常年經費酌定爲一萬二千兩卽由使費項下撥交出使法國大臣按年支銷照章造報如蒙 允卽由 臣部分別咨行欽遵辦理得 旨如所議行○己亥署兩江總督李鴻章奏予祭葬賜卹如例○庚子以周馥署兩江總督胡廷幹署山東巡撫○辛丑錫伯營領隊大臣色普西賢因病乞休允之○壬寅以希賢爲錫伯營領隊大臣○外務部奏英國於南斐洲新闢打蘭士噠路等處開辦礦務招募華工由出使英國大臣張德彝與英外部訂立保工章程十六條 臣部於本年三月奏明請 旨派員查押在案 臣等查該章程第六款內載 大清國 大皇帝可以簡派領事官或副領事官前赴華工所至之英屬或歸英保護之地照料彼等利益安樂等語邇來各省工人應募出洋者絡繹不絕該屬地層集華民日益繁衆窮荒散處糴糶難齊自應亟設領事前往駐紮妥爲保護庶使海外僑氓有所鈐束不至隔閼渙散仍貽失所之虞查有二品銜直隸候補道劉玉麟游學美洲才識優長於外洋情形極爲熟悉迭次隨同使臣襄辦事件罔不妥洽擬請 派爲南斐洲英國屬地總領事所有應募華工統歸

管轄隨時彈壓稽察認真經理務將該處苛待條例設法消除遇事仍稟商臣部及出使大臣黃臻詳慎如蒙 俞允卽由臣部援案繕具文憑刊刻鈐記頒給該員收執欽遵前往擇要駐紮並咨行出使英國大臣遵照辦理得 旨如所議行○外務部奏光緒三十年八月十七日奉 上諭直隸津海關道唐紹儀著開缺以三品京堂候補賞給副都統銜前往西藏查辦事件欽此臣等伏查中國西藏邊界與英之印度接壤自光緒十六年中英兩國訂立藏印條約八款十九年復將立約未結之通商游牧交涉三款議訂九條並續款三條旨明與原約一律奉行嗣因藏人爭執久未照辦上年英員帶兵將入藏界迭經臣部遵 旨電達駐藏大臣帶同藏員赴邊會議並電駐英使臣切商英外部停止進兵乃達賴不聽開導始終梗阻以致英兵深入於本年六月間行抵拉薩迭據駐藏大臣有奏來電英員榮赫鵬開送條約十款已與番眾畫押臣等以西藏爲我屬地應由中國督同番眾與英立約不應由英與番眾逕行立約致損主權且約內尚有應行商改之處已電知該大臣切勿畫押復據有奏電稱英兵已退往江孜少留卽回印度此新約尙未議定之大略情形也現在唐紹儀奉 命赴藏應請 頒給敕諭派爲議約全權大臣卽由海程前往取道印度與英國所派全權大臣將此次條約應如何分別聲明酌量改訂之處詳細磋商以期妥協臣等謹擬 敕諭一道繕單恭呈 欽定請用 御寶發交唐紹儀祇領並刊給木質

關防一顆文曰 大清欽差議約全權大臣關防俾資應用伏候 命下卽由臣部欽遵辦理報聞○癸卯永定河南四工南二工漫口合龍○甲辰諭軍機大臣等有人奏青州副都統鳴鶴營貪婪侵餉賄賂賣缺贖列贓款開單呈覽等語著胡廷幹按照所參各節澈底清查據實參奏毋稍徇庇原摺片單均著鈔給閱看將此諭令知之

冬十月乙巳朔時亨 太廟 上親詣行禮○頒給通州王恕圖等處煮賑米石○裁撤四川通判三缺州判一缺縣丞兩缺驛丞三缺鹽大使兩缺○裁撤山西同知一缺通判二缺州判二缺照磨一缺縣丞三缺主簿一缺巡檢十二缺驛丞四缺鹽巡檢三缺○張之洞奏湖北施南府屬境地本係苗疆界連巴蜀其宜昌府屬鶴峯州亦苗疆舊地連接湖南均屬民風番野伏莽繁滋遠距省城一千九百八十餘里聲息每多阻隔而湖北之有教案實自施南府屬之利川縣始利川與四川夔州府屬縣多有接壤夔府教堂素多十六年前利川天主教堂教民卽已不少積案纍纍以後民教之嫌隙日深教民之蔓延日熾案已斷而復翻讐已解而復結近年施南府屬並有傳耶穌教者於是天主耶穌兩教教士設堂日廣依附日多爭端迭起施郡所屬山深林密素多會匪徒見民教齟齬益復從中煽誘蘊毒愈深地方官政事紛繁於民教涉訟之案未必皆能立時清理甚或袒教抑民含糊了事民情忿無所洩則相率入教以

爲抵制奸猾之計陽託教堂以自庇陰通會匪以尋仇伺機竊發隱患方深知府權力既有不足營汛武員又多與地方民事隔膜呼應不靈防範偶疏弊端立啟近年宜施兩屬會匪教案屢釀巨禍光緒二十四年至煩兵力剿辦懲創不爲不嚴而愚民罔顧輒以一朝之忿忘身及親絕不知所儆懼至此次而恩施縣屬又出事端幸調派勇營分投彈壓查拏兇犯辦理迅速亂乃遏已尙未致釀爲厲階懲前愆後若無大員前往駐紮督察鎮撫時往各處巡察將所有教案秉公剖斷及早消弭誠恐此後地方仍難平靖設使再生枝節必致牽動大局斷不能如此次之平安妥結其貽患何堪設想然僅派一候補道員無管轄地方之權州縣不皆聽命則仍無濟於事臣體察情形反覆籌度必須增設實缺道員兼轄文武俾分巡屬境相機調度理冤釋枉加意拊循使民教調和相安無事嚴辦會匪奸宄潛蹤庶足以綏靖邊圉安輯民生查鶴峯州雖隸屬宜昌而距施南府城較近僅一百餘里與湖南犬牙相錯遇有招解人犯例須由道府勘轉鶴峯距宜昌府已四百七十里距荊州道途更遠至千有餘里公事諸多窒礙駕馭勢有不及亦宜變通辦理茲擬請於施南府城增設兵備道一員並請將鶴峯州升爲直隸廳同知由宜昌府屬撥出經理其事此項新設之道員卽管轄施南一府鶴峯一廳名爲分巡施鶴兵備道並以派往施南駐紮之常備軍一營作爲施防營歸該道節制調遣此道缺應作爲苗疆最要之缺由外揀員請補臣此次

另摺奏請裁撤湖北督糧道一缺查糧道應領俸銀除均攤完缺外實支銀四十二兩有奇應領養廉銀除扣成減平外實支銀三千七百六十兩應請卽以糧道原支俸廉作爲施鶴道俸廉並將糧道衙門應支吏役工食一併移作施鶴道衙門吏役工食於帑項絲毫無所出入而施鶴地方得有監司大員鎮攝其間以時巡察撫綏凡吏治教案責令盡心督理防患未然實於鄂省大局化俗弭亂之道大有裨益惟施南深僻瘠苦創設該道之意自應隨時巡察各屬周歷山鄉方能杜絕以消弭教衅屬縣皆係貧瘠其所到之處夫馬供給概令自備斷不准絲毫擾及屬官鄉民是該道辦公所需斷難甚少僅此俸廉之數實有不敷臣當於清查陋規項下酌量核給該道辦公經費以資整飭而免擾累其鶴峯直隸縣之缺亦請作爲苗疆要缺由外揀補其鶴峯州一缺雖改爲直隸縣所有俸廉役食衙署一切可悉仍其舊如蒙俞允分別改設移設應由部頒給湖北分巡施鶴兵備道鶴峯直隸縣同知關防各一顆其鶴峯州州判擬請改爲鶴峯直隸縣經歷駐紮產茶素多之劉駕司以資彈壓鶴峯州訓導擬請改爲鶴峯直隸縣訓導鶴峯州吏目擬請改爲鶴峯州直隸縣司獄其所轄山羊隘巡檢應仍其舊以上各缺請由部一併換給印記以昭信守所有施鶴兵備道暨鶴峯直隸縣同知員缺應俟接准部覆後由臣揀選委員分別請補仰懇天恩俯念苗疆險遠教案紛繁總求爲地擇人暫勿拘以資格此外經歷司獄等員應否

據員更補另由臣咨部辦理得旨如所請行○端方奏田賦一項乃國家維正之供蘇省地處膏腴賦入素稱繁富自光緒二十五年清賦以後州縣既無喫荒之術紳戶亦鮮抗租之人然猶不能實徵及額者則以報荒之田較多而查荒之法未盡也現計蘇屬四府一州荒田荒地不下二百餘萬畝以鎮江蘇州爲最多常州次之而松江太倉爲最少大抵荒田之數有實荒虛荒之不同實荒約分兩層一爲板荒卽歷年轉除糧賦之田畝其中有不可耕者如設園荒塚挖廢坍沒皆是餘則高下崎零工不易施者亦所在多有一曰災荒則熟徵歉蠲歲無定數者是矣虛荒亦分兩層有已徵之荒如豪家巨室差完全漕則以熟報荒者有之冊書經造得冊舞弊則以熟列荒者有之漕書戶書侵挪私蝕藉荒彌縫保社甲總勒佃廢排藉荒隱射者又有之凡此皆弊在業戶胥吏者也至於未徵之荒則有因兵燹以後載籍無存業戶自有以多報少者有客民開墾未經丈畝約略開報者又有零星小坵隱匿不報或一墟兩坵報甲不報社者此弊在業戶佃戶參半者也實荒虛荒常居荒中之多數弊混既深鉤稽不易巨紳猾吏相迫使然各州縣固不免依違其間亦實苦於無從下手惟值此時蠲餉紓之際此等國賦正款萬不容稍存隱忍不事清查蓋不獨別項誅求恐傷民力抑且使財賦所出之地荒熟永遠難稽廢棄可惜墾闢無從未免有傷政體奴才與司道熟商惟有先定墾荒章程以爲墾荒地步其法先查各屬歷年報荒田畝

定爲板荒由農務局提出招墾其餘新荒皆令報荒之戶指實荒地之所在准其報明豁糧由局一律招墾若本年災荒則應由各州縣於秋勘案內勘實成數或徵九減一或徵一減九總以不使全闕錢糧與板荒相混爲要領並於板串內載明減收數目俾民間得咸沾實惠而招墾時不難稽查虛荒似可擠出大半至零星小坵墾墾之數如欲清釐非澈底丈量不可擬俟招墾辦有頭緒板荒實數既有大宗可查然後追求小數則事前庶免紛擾屆時亦易於鉤尋丈量一層從緩再爲置議其開墾章程則分別官荒民荒土佃客佃及繳價升科各條務從便民隨時通變蘇省物力既厚農工亦勤倘能加以考求不難化瘠爲腴易礪成沃此又地利人事更迭爲用不宜失圖者也其餘未盡事宜俟開辦後體察情形再行斟酌辦理下部知之○丁未授裕德爲大學士以世續協辦大學士○增祺等奏本年五月增祺與臣廷杰以扎薩克圖王旗荒地將次放竣非建設府縣各官不足以資分治而安民生當經查照歷次設治添官成案因地制宜酌擬於雙流鎮建設府治名曰洮南府就該鎮東北之白城子設立一縣名曰靖安縣又在該鎮東南之哈拉烏蘇設立一縣名曰開通縣所有添設府縣教佐各官缺仍隸奉天省管轄等因具奏於光緒三十年六月初二日奉到 硃批著照所請該衙門知道欽此○等遵卽會同遴員分往先行妥爲試辦並飭將該府縣疆界詳晰劃清各專責成除開通縣設治之哈拉烏蘇現改移附近之七井

子較爲扼要其餘悉照原擬辦理茲將設治添官應辦一切事宜參考舊章悉心酌擬分欸繕呈覽
祇候 欽定遵行下部議奏○諭軍機大臣等瑞洵電奏收哈事宜須地方官切實查辦非嚴定功過難
期得力著潘效蘇體察情形妥議具奏○戊申以長庚爲兵部尙書○以溥頤爲左都御史○調綽哈布
爲成都將軍以清銳爲荊州將軍○己酉授裕德爲體仁閣大學士○商約大臣呂海寰盛宣懷與大西
洋國駐京公使白朗續定中葡商約二十欸成其文曰 第一款 大清國大西洋國於光緒十三年
十月十七日卽西歷一千八百八十七年十二月一號所立和好通商條款以及該約所附之辦理洋藥
專條除本約所有改修外均應仍舊遵行 第二款 所有光緒二十七年七月二十五日在北京會定
議和條約內之第六欸所定加增進出口稅則葡國茲允遵照辦理但別國所享最優利益葡國應得一
體均霑無異且葡國之商民所定稅項始終不得較無論何國商民所定者稍有增減故曾於光緒十三
年十月十七日所定條約內第十二欸應行銷廢 第三款 葡國願允遵照光緒十三年十月十七日
會定通商條約及辦理洋藥之專條所載各節仍襄助中國徵收由澳門運往中國洋藥之稅釐並助緝
私且爲此等襄助能有實效起見茲應聲明所有入澳門之洋藥抵口時必須在澳官專設之洋藥衙門
報明入冊澳官亦應設法俾凡入澳門之洋藥均囑於棧房一處以便由澳官專管再行陸續搬出以爲

貿易之需凡澳門所轄地方食用之洋藥應每年由澳官會同光緒十二年商定辦理洋藥專條之第二款所指之稅務司議明定數此數以外始終不得由該棧房再有搬出以應該處之食用凡洋藥若在該棧房報明轉運中國以外各處亦應設法以防私行運往中國銷售所有應定各項章程以資遵守本款之辦理應由彼此兩國商訂葡國應迅速定一律例訂明如有犯彼此商定之約章者即應分別懲辦

第四款 澳門所轄水陸地方內如何防緝走私應由澳官擬議節略會同稅務司定辦其附近一帶地方如何防範應由稅務司擬議節略會同澳官定辦俾兩國得相助之益與地主之權無礙且澳官與中國海關各應選派專員彼此會同訂明查緝之水陸地方並可行之辦法以便協助防緝走私 第五款 彼此兩國為推廣澳門及廣東省所附近澳門之口岸來往行輪起見現經商定如左一所有葡國輪船若欲自澳門前往光緒二十三年中英會訂細約之專款及二十八年續議通商行船條約第十款所載之西江暫行停泊上下客貨並僅上下搭客之各處即應遵照彼此兩國為此事商定之專章辦理二所有輪船若特經註冊按照內港行駛章程貿易者除第一節所載廣州府各處外如欲自澳門來往廣州府所轄之各埠即應遵守彼此兩國商定之專章在拱北關報明以便查驗抽稅三此項船隻如拖帶民船搭客載貨等情均可承做惟須遵守已定之一切章程不得違背四此款給予之利益其本基金

賴彼此先訂專章載明彼此船隻來往各處之詳細辦法故該章未定以前自不得援引此款辦理既定以後如不遵守此章仍不准照此款辦理五葡國迅速定一律例訂明如有犯彼此商定之約章者即應分別懲辦 第六款 中國給予最優待他國人民一切利益葡國人民既應一體均沾彼此現應訂明凡有他國土產中國所給予各項利益葡國同類之貨即應一體享受彼此又訂明葡國各項酒若酒力過十四度者由進口時無論係由葡國進由他處繞進如呈出本國所給之執照有領事官畫押為憑載明此酒實係葡國所產者即照本約所附稅則內載過十四度酒納稅惟葡國牙酒一項如不能呈出以上所言之執照即不得援引此條以冀同享此等利益凡中國商民運貨在葡境進口出口者亦應享受給予最優待國人民一切之利益 第七款 葡國人民准中國已開及日後所開為外國人民居住通商各口岸通商地方往來居住辦理商工各業製造等事以及他項合例事業且在各該處若定有為外國人民居住地界則准其在該界內租地建造居住並給予最優待國一切之利益一律無異 第八款 僑寓葡地之他國人所生子應按葡國律例准入該國之版籍中國為僑寓澳門所轄地方之華人入葡國版籍者請將該律例情節酌行修改是以葡國茲允從速將此層細核以便整頓僑寓葡地之華民所生子應准入葡國版籍之情事如須專定律例亦可照允 律例應防之事有二一已入葡籍之華民

應杜其冒享華民所能獨享之利益卽如在內地或不通商口岸居住貿易等事二已入葡籍之華民在通商口岸居住時自稱華民與他華民立有合同者必杜其嗣後恃已入葡籍藉乘此故以所立合同與葡國某律例有背冀以脫卸其責任 第九款 中國現因釐革財政擬欲照徵海陸各關所過百貨之正稅外另添加稅以補全行裁釐所絀之款葡國政府允認凡有本國商民運進中國之洋貨於抵口時應照此次改定之進口稅則加添一倍半之數納稅所有中國土產運往外洋者於出口時應納稅數連出口在內不逾值百抽七五之數惟聲明中國須與有約各國共同商定加稅之率一律照輪無異所有中國徵出產銷場出廠以及土藥鹽斤等稅亦悉照各國與中國商定辦法無稍歧異並不得因此葡國之商務暨利權較地國商務暨利權致有軒輊之處 第十款 還稅之存票須自葡國商人稟請之日起如查係應領者限於二十一日之內由海關發給此等存票可用在發給之海關按所載銀數除船鈔一項外以抵各項貨稅至洋貨入口後三年之內轉運外洋凡執持此等存票者卽准任便向發給之海關按全數領取現銀倘請發存票之葡商欲圖混騙一經海關查出須罰銀照其所圖騙之稅數不得逾五倍或將其貨物入官該貨若已運出中國界外則應由本國領事將犯事人罰一合宜款項其所罰之銀送交中國國家查收 第十一款 中國允願自行釐定國家一律通用之國幣將全國貨幣均歸整

一卽以此定爲合例之國幣將來中葡兩國人民應在中國境內遵用以完納各項稅課及別項往來用款毫無窒礙惟彼此商明凡納關稅仍以關平核計爲準 第十二款 葡國茲允中國禁止莫啡鴉及刺入肌腐莫啡鴉之各針進口惟中國亦須應允凡葡國醫生藥鋪如爲醫病所必需於其進口請有專單照章納稅始准起岸惟該醫生藥鋪須先在葡國領事署內出具妥當切結聲明非有西國醫生藥單不得出售卽有此項藥單亦僅以此須少數出售始將專單發給倘有混騙之事一經海關查出卽將拿獲之莫啡鴉及莫啡鴉針繳入官並禁止該混騙者以後不准再將莫啡鴉及莫啡鴉針販運進口

第十三款 中國因知振興礦務於國有益且願招徠華洋資本興辦礦業故允將現行礦務章程重新修改妥定於他國現行章程採擇其中有與中國情形相宜者以期一面振興中國人民之利益於中國主權毫無妨礙一面於招致外洋資本無礙且比較諸國通行章程於礦商亦不致有虧葡國人民若遵守中國國家所定爲中國人民之開礦及租礦地輸納稅項各條規章程並按照請領執照內載明礦務所應辦之事可照准葡國人民在中國地方開辦礦務及礦務內所應辦之事至葡國人民因辦理礦務居住之事應守中葡彼此會定之章程辦理凡於此項礦務新章頒行後始准開礦者均須照新章辦理

第十四款 凡商民爲辦正經事業合股經營或合辦貿易公司照其合同章程所有損益一律公任

是以中國願允中國人民若與葡國人民爲葡國合股經營貿易或葡國合辦合例之公司須照其所立合同章程辦理倘不照辦致被控告中國公堂應卽飭令中國人民照中國商律將其分內當爲之事按照合同章程辦理惟該合股華民分內當爲之事應與合股葡民分內當爲者一律無異不得另有苛求葡國人民與中國人民爲中國合股經營或中國合辦合例之公司亦應按照合同章程辦理倘不照辦致被控告葡國公堂應卽飭令葡國人民照葡國商律將其分內當爲之事按照合同章程辦理該合股葡民分內當爲之事亦須飭令與合股華民當爲者一律無異惟照現行約章不准洋商在中國內地居住貿易此項合股經營貿易公司自不得由中葡商民在內地合辦 第十五款 葡國本有定例他國若將葡國人民在該國內所使之貨牌竭力保衛以防假冒則葡國亦將該國人民在葡國所使之貨牌一律保衛茲中國欲本國人民在葡國境內得享此項保衛貨牌之利益允許凡葡國人民在中國境內所使之貨牌亦不准華民有竊取冒用或全行冒仿或略更式樣等弊是以中國應專定律例章程並設註冊局所以便洋商前往該註冊局所輸納秉公規費請爲編號註冊凡葡國人民若創製新物新法在中國專管創製術門定有創製專律之後請領創製執照者中國查察若不犯中國人民所先出之創製可由葡國人民繳納規費後卽給以專照保護並以所定年數爲限與葡國保衛華民在葡國所請創製

執行者一律無異 第十六款 中國政府深欲整頓本國律例以期與各國律例改同一律葡國允願

盡力協助以成此舉一俟查悉中國律例情形及其審斷法及一切相關事宜悉臻妥善葡國即允其治外法權 第十七款 中國專視傳教一事必須詳細商酌以免從前啟衅滋事將來復萌倘中國與

立有條約各國派員會查此事盡力妥籌辦法葡國因有保護其本國在華天主教堂之責允願亦派人員會同查議盡力妥籌以期民教永遠相安 教士應不得干預中國官員治理華民之權中國官員亦不得歧視入教不入教者須照律秉公辦理使兩等人民相安度日葡國教會准在中國各處租認及承租房屋地基作為教會公產以備傳教之用俟該地方官查明地契妥當蓋印後該教士方能自行建造合宜房屋以行善事 凡有遵照教規無論中葡人民安分守教傳教者原因勸人為善自不得因奉教致受欺侮凌虐惟入教與未入教之華民均係中國子民例應一體遵守中國律例敬重官長和翁相處凡入教者與未入教以前或入教後如有犯法不得因身已入教遂免追究凡華民應納各項例定捐稅入教者亦不得免納惟抽捐為酬神賽會等舉起見而與教相違背者不得向入教之民抽取 第十八款 現訂之條約須施行十年自換約之日起直至下文所載續修改定之日為止兩國又訂明或中國或葡國在十年期限未滿以前六箇月之內均可請將條約所載之稅則及各款修改倘十年期滿之

前尚未照請修改則由該十年期限已滿之日起算續行十年以後均照此限辦理 第十九款 本條約繕就漢文葡文英文各二分共六分署名爲定爲防以後辯論起見此三種文法語意均屬相同無異惟將來漢文與葡文如有參差不符應以英文爲準 第二十款 本條約應奉 大清國 大皇帝陛下大西洋國大君主陛下 御筆批准既經批准後迅速在北京互換並應刷印頒行以便彼此兩國官商人民知悉一體遵照辦理本約立定由兩國特派大臣先行書押蓋印以昭信守○督辦鐵路大臣盛宣懷與大西洋國使臣白朗穀訂立廣澳鐵路合同三十一款○庚戌 上奉 慈禧端佑康頤昭豫莊誠壽恭欽獻崇熙皇太后 皇上升誠壽恭欽獻崇熙皇太后幸頤和園駐蹕○慈禧端佑康頤昭豫莊誠壽恭欽獻崇熙皇太后 皇上升皇極殿奧國使臣齊幹美國使臣康格德國使臣穆默俄國使臣雷薩爾比國使臣葛飛業等覲見呈遞恭賀 皇太后萬壽國書○辛亥以永定河漫口合龍予道員王仁寶等升敘有差○以扎拉豐阿爲塔爾巴哈臺領隊大臣○達桂等奏通肯克音柞樹岡巴拜各段荒地自光緒二十一二三年經前將軍增祺恩澤及查辦事件大臣延茂等先後奏准開放創設之初原以各該段爲江省最腴之地擬定旗領民佃藉裕生計故於通肯克音則議以通省各城按旗分領旗交押租民人承佃於巴拜則議以大小旗署永爲辦公津貼荒價全行豁免但招民人承佃於柞樹岡則專爲將軍副都統兩處值班章京及五

司銀庫等津貼之費 朝廷養旗僕可謂至優極渥然行之日久不惟毫無功效而愚即伏於初議之中請爲我 皇太后 皇上詳細陳之查各該處距省較遠事事讓省城先著遂各辭以無力承領通克兩段名爲調劑通省旗僕其實僅省墨兩城其領又加以旗領民佃由旗交押租者每晌民輸糧一石民自交押租僅認旗人爲地東者每晌輸糧六斗當時文告頗仍大張曉諭小民雖急欲求地赴通克兩段守候然因此觀望遷延年餘竟未放出一晌迨後省城八旗營站借一 俸餉抵交荒價以爲之倡民之黠者乃轉而約集多人願交押租認旗爲東每晌納糧六斗其意以爲 朝廷無旗民之分政令無彼此之別不如此承認不能得地倘久不承領又恐弛禁之荒重行封禁不如暫且領地俟升科之年更作計較固非甘心認東納糧也旣而放荒僅出四十萬餘晌通克兩段地已告罄與原勘一百餘萬晌之案不符八旗營站以俸餉抵領者尙有三旗無地是旗與旗不同且地有交價不交價之別糧有一石六斗之分界址毗連互相爭競卽民與民亦有不同甚或旗人包攬大段轉賣民人願與旗招民墾之案則謬更有教民句通教士謂通克與綏化毗連同爲中國赤子何以彼祇納租六百六十文此則有一石六斗之重強爲干預先行聲明立案局限祇交六百六十文者錯雜紛紜莫可言狀益以庚子之變民人逃散通肯克音而外沃壤如巴拜竟至無人過問此自開辦以來之實在情形也夫辦法既誤流弊卽多通肯克

音柞樹岡三段於二十三年出放者至二十九年及本年均已限滿升科無論其未經開墾者即已經開墾之地民間借口於教民立案限祇交六百六十文遂羣相計議若官代催糧則抗不完納若旗東往催則不知地在何處佃戶爲誰無從下手倘僅令界官下鄉則將羣起婉求照贖納租祇交六百六十文但收一戶則各戶援以爲例而一石六斗之說即歸烏有此猶弊之在民者即以旗人言之無論尙有三旗無地即已得地之旗營原領之時係按官兵職銜大小核計一年俸餉撥地若干地數多寡不一界址未分東佃兩不相認欲官爲經理乎則撫字催科固地方之責然未聞有代行催收私租者欲省城八旗營站派員自往經理乎竊不知地在何方勢須通肯衙門派員會同徵收而歲有賠款地有肥磽將來考成分數其咎安歸就使一切不慮民亦願甘輸糧該荒各距綏化廳三百里不等其間並無村鎮可以回集以粗笨之物求售於數百里之外按中稔之年糧價和平計之每糧一石得價不過三四千除去盤腳及催租花銷之外恐不敷每晌六百六十文租賦之數事至此時棄之不能留之爲累是旗人受如此厚恩利未見而害已形積年既久子孫相承後患正無已時而巴拜之通省津貼地至今尙屬荒蕪柞樹岡之自津貼地亦同畫餅更爲可惜此通克各荒受弊之實在情形也奴才慶祺前於二十五年奉命辦理通克荒務遵卽面奏蒙 恩寄 諭恩澤會同商辦到任五載曾查出浮多二十餘萬晌照核

計原勘之數不敷仍多夙夜籌維苦無善計奴才德全上年在京亦曾奏請變通惟以事非經手不能通快利弊奴才遠桂早知各荒辦理歧異以致日久無功然出化鄰省不詳底細近來和衷商酌彼此均以變通爲是顧一時難得要領當飭原辦招墾行局之協領瑞麟與現辦行局之佐領托勇武攜帶案卷來省參核並飭五司八旗及墾務總局一併研究總以不失原案調劑旗人爲宗旨而又必旗民融洽民教相安裕餉實邊各有裨益往復討論該旗等曉然於天恩之不可負後患之不可貽但求有益於國計民生其司旗之調劑卽寓焉耳奴才等復指示簡明辦法旋據該司旗等稟稱省城旗營屯站以餉抵租在通報領之地屆限每納糧一石者墾戶本未代交押租擬令每晌交納京錢六吊二百文作爲已產其錢以二吊一百文歸還原領旗戶以二吊一百文發商生息不准私動長年所獲利銀永作八旗營站現在當差官兵津貼以垂永久所餘二吊一百文備找三旗無地之戶官兵原餉若有盈餘儘數歸併發商生息八旗營站一律分別撥給卽墨爾根官兵之地亦應查照辦理以免向隅至若柞樹岡津貼地價原係墾戶代交屆限每晌納糧六斗者墾戶前已交押租每晌再交京錢四吊二百文作爲已產其錢以一吊一百文發給當年出名之人以一吊一百文作爲此次設局辦公經費所餘二吊文仍照前章發商生息所獲利銀永作各司處隨時當差官兵津貼以昭公允至若通肯散戶所領之地有名雖東戶實已私

賣者本當錢地入官惟念旗人得價早已花盡銀戶亦經出有重資若不稍示矜憫辦理恐難順手除當日買價不問多寡卽作應交押租不復找還外但此項荒地雖與正款押租無關而官中亦當量予收納以資辦公卽按新章減半每晌令交京錢三吊一百五十文卽換給大照作爲己產其錢悉歸公用此乃格外體恤况究前非倘兩造或有狡賴定卽嚴懲其餘各旗散戶領地並未轉賣者無論租糧多寡果屬東戶相認確無異議仍准聽其自便設有彼此願爲轉兌者亦准按照新章辦理以示大公總之變通一舉原爲旗民輟輻租賦混淆起見今既一律改變所有升科後應徵大租自當向新戶催納以昭平允各等情開單呈請具奏前來奴才等覆核所議皆係實在情形既不失調劑旗人之本意而民人得地以後子孫傳爲世業雖出荒價當亦衆所樂從果能變通盡利不易可行不獨通肯克育柞樹岡三段已放之荒積累一清卽巴拜未放之荒亦不難推廣辦理漸次開墾合無仰懇 天恩俯念邊荒糾紛不清久無成效准照此項所擬章程大爲變通以惠旗民而裕餉原之處出自 聖裁得 旨著照所請戶部知道片併發○甲寅 慈禧端佑康頤昭豫莊誠壽恭欽獻崇熙皇太后萬壽聖節 上率王公百官詣排雲殿行慶賀禮○丙辰 上奉 慈禧端佑康頤昭豫莊誠壽恭欽獻崇熙皇太后由頤和園還宮○戊午以安成爲塔爾巴哈臺參贊大臣○己未諭朕欽奉 慈禧端佑康頤昭豫莊誠壽恭欽獻崇熙皇太后

慈育本年冬至令節次日在皇極殿受賀皇帝親遞表文欽此所有應行禮節該衙門敬謹預備○庚申
諭軍機大臣等政務處奏代遞杭州將軍常恩電奏一摺據電稱協領墨爾根圖春梁等朋黨把持賄託
言官捏造污穢等語該將軍被人參劾業經降旨飭查自應聽候查辦乃先時曉曉置辯率行發電陳請
代奏殊屬非是常恩著先行交部議處所稱各節著交端方歸案併查據實覆奏○蠲免直隸開州等三
州縣錢糧○辛酉 慈禧端佑康頤昭豫莊誠壽恭欽獻崇熙皇太后 皇上升 皇極殿英國使臣薩
道義日本國使臣內田康哉法國使臣呂班韓國使臣閔泳喆等覲見呈遞恭賀 皇太后萬壽國書○
諭軍機大臣等工部代奏主事陳畚敬陳管見一摺據稱三門灣爲南田一隅南田環象山半地爲南五
省樞紐請經理南田安內靖外等語著崇善張曾敎按照所陳察看情形妥籌辦理原呈著鈔給閱看將
此各諭令知之○癸亥諭商部奏職官入署賄託據實糾參一摺據稱工部主事榮光函致該部郎中毛
祖模爲商人關說煤礦經該郎中呈堂舉發傳訊榮光信函實係親手所繕並有邀准後允餽銀兩親立
字據爲證等語榮光係屬職官宜如何束身自愛乃敢赴部賄託毫無顧忌實屬荒謬著卽行革職以肅
官箴○諭袁世凱奏查明各屬秋禾災歉請蠲緩糧租一摺本年順直地方六七月間節次大雨山水下
注以致永定滹龍等河堤岸漫決瀕臨各河窪地禾稼均多被水並因大時不齊各屬有被雹被蟲被旱

被竊被風之處若將應徵糧租照常徵收民力實有未逮加恩著照所請所有勘明成災五六七八九分及歉收三四分不等之武清等二十四州縣又勘明歉收三四分不等之通州等二十州縣應徵錢糧及各項旗租均著按照原奏所開被災分數分別蠲緩帶徵並將應徵屯米穀豆草束皂課學租旗產錢糧河防海防經費儲備軍餉廣恩庫租通津二幫屯租一併分別蠲緩帶徵其兵部馬館鑾儀衛地租永濟庫租帶徵租及出借倉穀籽種口糧牛具等項著一體緩徵並分別減免差徭以紓民力○甲子諭倉場衙門奏監督犯法營私任用倉匪據實糾參一摺北新倉監督景豐等任用倉匪種種舞弊自應嚴行懲辦監督兵部員外郎景豐理藩院主事存聯均著卽行革職以儆儆尤倉匪章順書手藍榮林著交刑部嚴行審辦其在逃之周光宗著步軍統領衙門順天府五城一體嚴拿務獲歸案訊辦○乙丑諭軍機大臣等御史黃昌年奏請挽回帑政一摺粵漢鐵關鑿緊要現在合興公司正議廢約應卽另籌辦著張之洞悉心核議妥籌辦理以挽利權原摺著鈔給閱看將此諭令知之○外務部奏南斐洲英國屬地招募華工前經兩國會訂招工章程十大條該約內聲明中國可派領事官駐紮該處保護華工利益復經臣部擬派直隸候補道劉玉麟充駐紮該處總領事官於本年九月二十七日具奏奉 旨依議欽此遵卽照會英國駐京使臣並電致出使英國大臣知照英外部允認各在案旋准出使大臣張德彝電稱英

外部業經覆准惟總領事委任文件須請用 御寶方能請英君親批准敕等語臣等查泰西各國於派領事官時本國發給委任敕書並由領事駐紮之國發給國主允認批敕執爲信據此次派駐南斐洲總領事官所有華工一切事宜悉歸經理創設伊始責任宜專英外部既以派充信據爲重應請援照各國通例 頒給委任 敕諭俾專責成於該總領事應享權利深有裨益臣等謹擬 敕書一道恭呈 御覽伏候 命下卽由臣部繕寫清漢文字請用 御寶發交劉玉麟恭齋前往並行知出使大臣照會英外部請給准敕以昭信守得 旨允行○外務部奏查辛丑和約第六款內載諸國償款海關銀四百五十兆兩按年息四釐分三十九年清還本息用金付給或按應還日期之市價易金付給等語各省督撫臣以照約表應按定約時之金價付銀不應按還款時之市價易金付給屢次電請力爭迭經臣等與駐京各使切實照會並往返面商復電駐各國使臣與各國外務部辯論僅美國應允按表還銀其餘各國堅持未允各使照覆均謂賠款爲金款之債細核約文毫無疑義現因銀價跌落賠款以銀付給自較約載原數有加然不能因此致違定約並謂四百五十兆兩不過按照是年西歷四月初一日之市價合成兩數俾中國易於計算耳中國不能因金價增長而受巨虧獨不思各國因中國致費巨款所用本係金錢又豈能受落價之錢幣以歸還償款其詞皆甚決絕無可婉商又臣部前於二十八年三月三十日奏請

飭下前兩江總督臣劉坤一熟籌辦法轉飭江海關道就近與各國派出之銀行董事詳細辯明二十九年湖廣總督臣張之洞在京時亦迭與駐京各使磋商此事均未能就範每屆還款之期雖由江海關道照銀數付給各國銀行該銀行公會每期開送清單仍悉按以銀易金計算載明虧欠數目并將欠款於結算後即一律起利照此核計至本年三年屆滿虧欠之數約已逾千萬駐京領銜奧使齊幹等亦按期照會臣部聲明中國短付本息之數奉本國政府諭令實力索還臣等夙夜籌思萬分焦灼徒以約文爭辯亦屬無裨若再事宕延則負欠愈久積數愈鉅彼終有索還之日恐後患必且無窮本年六月間各使聯銜來照稱中國按月還款金銀價值漲落不一嗣後可將金價按月定準並允與中國展緩時限若每月償還之款較應還之數有虧所虧之數與賠款之本一例出利倘至三十九年終中國交還賠款總數尙有不敷仍應按月接續歸還至本利全清而止此外別無辦法等語察其詞意既於無可減讓之中略予通融之法惟展緩一節虧欠之數仍一例以四釐計息則欠數必逐年遞增算至三十九年之後將又積成數萬萬之鉅款臣等復擬將歷年遞欠鎊虧俟三十九年後統計還本免利各使仍堅執不允是欲圖展緩於目前實貽重累於日後思維再四兩害取輕究不如設法補苴以期年清年款因另擬辦法三端切商各使一金價須按月折中算定一以前虧欠之款免再計息一未屆還期每月預付之款須按

月扣還恩銀以上三端如各國俱允照辦中國即允於本年西歷年終將以前所欠之款一律清還並允以後每年應付之本恩年終必掃數全清臣等擬此辦法蓋以按月折中定金價可免還款屆期金價驟漲之害欠款免恩及按月扣還恩銀均可以減輕現在之虧累而扣恩一層將來之節省尤多如俱照行於賠款不無小補數月以來爲此事反覆磋商唇焦舌敝現察各國漸有應允之意惟計期十一月下旬卽是西歷年底一有成議屆時卽須踐約清償款鉅貳迫能否籌措足數尙無把握已由臣部隨時與戶部熟商從速預爲籌備亦明知各省爲攤派賠款羅掘已空騰挪匪易苟還銀一說稍有可挽回之處臣等受 恩深重具有天良亦何忍竭萬姓之脂膏以供列邦之攜取無如議論三年迄難結束各國銀行且乘此而虛增還期之餉價苛算欠款之利息懸宕愈久受虧愈多不得已而思補救亦祇能就公允之情理以期抵制於毫末舍此別無善策實深悚疚查此事前奉 電旨著鐵良端方督同滙道悉心磋商昨據該侍郎等電奏以各領事無權不能著手請 飭下外務部照會各國公使轉飭各國領事就近商辦方能開議等語奉 旨外務部知道欽此臣等竊維此等要件議事權限全在各國公使應其政府訓令而行誠非領事所能爲力若由臣部照會各國公使轉飭領事商議向來無此辦法徒貽笑柄礙難照辦臣等爲大局起見不敢稍存拘執亦不敢再事遷延相應據實瀝陳請 旨裁奪伏候 命下遵行得

旨著照所請戶部知道○外務部奏等准和蘭駐京使臣希特斯照轉西歷一千八百九十九年在海牙城所訂日來弗條約推廣海軍之約論施醫船在開仗時辦理善事情形現欲助成此舉減輕該船用欸法國政府擬請各國公允將此等施醫船全免海口稅欸及船鈔等費因請和蘭政府轉請簽押各國揀派大臣會議此事茲准本國來文請 簡派全權大臣於本年西歷十二月間親赴海牙會議擬定條約底本亦可公同商酌等因 等伏查日來弗條約即係紅十字會光緒二十五年各國在和蘭海牙城議立保和公會奉 旨派前駐俄使臣楊儒前往會議已將推廣紅十字會行之於水戰條約奏明貴押本年六月間復經 臣部繕呈保和會約本請用 御覽作為 批准之據發交駐俄使臣胡惟德轉送和蘭政府存儲等因各在案茲和蘭使臣希特斯奉其政府之命照請派員會議施醫船免稅及船鈔等費中國既經入會自應接續與議以聯邦交而成善舉擬請 簡派出使大臣一員給予全權字樣屆期前往和蘭會議恭候 命下即由 臣部電行該大臣遵照得 旨著派胡惟德會議○外務部奏臣部於光緒三十年四月間准署理四川總督錫良咨准據礦務總局會詳英商立德樂來局面稱欲與華商集股合辦江北燠煤鐵礦產名曰華英合辦江北燠煤鐵公司擬集股銀五十萬兩務求允准照章開辦等語查川省原設保富公司專為華洋合辦各公司購地轉租開採既可以保我利權亦所以杜其侵佔茲

據該商援案來局請辦當經會同保富公司總會辦等再三商榷均經數次磋商與部定章程不相違背
續具華英合辦草合同十條經保富總公司總會辦暨該商立德樂同時簽押蓋用四川礦務總局關防
詳請察核分別咨送應請查核具奏等因並將漢洋文草合同咨送前來臣等逐條查核如所訂查勘承
辦並限滿復准其請展各年限以及礦地界限報効成數核與奏定章程並川省歷辦成案均不相符此
外各條字句之間亦當有應行增改之處當經臣部逐條電達川督飭局與英商立德樂再行磋商適值
該商業已離川未能與議本年九月間臣部准英國使臣薩道義知照謂該商現已到京所有四川江北
總礦務合同如今該商回川商改未免稽延時日擬請在京妥議經臣部與該商將應行增改各條迭次
磋商分別改定該商已無異議相應繕具清單恭呈 御覽如蒙 俞允即由臣部繕定改正合同與該
商簽押蓋印並咨行四川總督查照辦理得 旨允行○丙寅諭朕欽奉 慈禧端佑康頤昭豫莊誠壽
恭欽獻崇熙皇太后懿旨從來立國之道惟在保民近年以來民力已極凋敝加以各省攤派賠款益復
不支剝肉補瘡生計日感深宮懣懷民瘼常切疚心聞各省督撫因舉辦地方要政又復多方籌款幾同
竭澤而漁其中官吏之抑勒差役之騷擾劣紳訟棍之播弄皆在所不免吾民有限之脂膏豈能堪此剝
削言念及此能無惻然茲特明白宣示所有各省派捐等款除有大宗收數者姑准照辦外其餘巧立名

目及苛細私捐著卽概行禁止凡地方應辦要政仍當次第推行一切學堂工藝有關教養之事但當官爲剴切勸導應山紳民自行籌辦不准藉端抽派致滋苛擾各該督撫務當督令屬員深維邦本共體時艱毋負朝廷不忍重累吾民之至意○諭前據魏光燾張之洞會奏改建製造局廠一摺特派鐵良馳往詳加查勘再行籌議辦法因諭令順道抽閱營伍並所過省分出入款項一併查核期杜浮靡該侍郎行抵江南旣已竣事著卽過赴潯沚萍鄉兩處審定局廠應否移建地勢何處合宜卽行回京覆命仍將經過地方營務留心查看至各省司庫局所一切款目毋庸調查著卽責成該省督撫認真整頓不准浮收濫費力戒侵欺以恤民艱而重國帑○諭商部奏浙紳捐建農工小學堂收教墮民懇恩除籍一摺浙江墮民雍正年間已准除籍自新乾隆年間議准本身改業下逮四世清白自守者准其報捐應試等語現在該紳議設農工小學堂俾營實業以展造就著照所請行至畢業後應如何一體給予出身之處著學務大臣查照成案辦理○辛未以瑞興爲杭州將軍○壬申調隆斌爲荊州副都統以額勒春爲正藍旗漢軍副都統○是月義大利國新簡駐華使臣巴樂禮抵任